

## Mukāshafā

<sup>1</sup> Yih Īsā Masīh kī taraf se mukāshafā hai jo Allāh ne use atā kiyā tāki wuh apne ḳhādimoñ ko wuh kuchh dikhāe jise jald hī pesh ānā hai. Us ne apne farishte ko bhej kar yih mukāshafā apne ḳhādīm Yūhannā tak pahuñchā diyā.

<sup>2</sup> Aur jo kuchh bhī Yūhannā ne dekhā hai us kī gawāhī us ne dī hai, ḳhāh Allāh kā kalām ho yā Īsā Masīh kī gawāhī.

<sup>3</sup> Mubāarak hai wuh jo is nabuwwat kī tilawat kartā hai. Hāñ, mubāarak haiñ wuh jo sun kar apne diloñ meñ is kitāb meñ darj bāteñ mahfūz rakhte haiñ, kyonki yih jald hī pūrī ho jāeñgī.

### *Sāt Jamātoñ ko Salām*

<sup>4</sup> Yih ḳhat Yūhannā kī taraf se sūbā Āsiyā kī sāt jamātoñ ke lie hai.

Āp ko Allāh kī taraf se fazl aur salāmatī hāsil rahe, us kī taraf se jo hai, jo thā aur jo āne wālā hai, un sāt rūhoñ kī taraf se jo us ke taḳht ke sāmne hotī haiñ,

<sup>5</sup> aur Īsā Masīh kī taraf se yānī us se jo in bātoñ kā wafādār gawāh, murdoñ meñ se pahlā jī uṭhne wālā aur duniyā ke bādshāhoñ kā sardār hai.

Us kī tamjīd ho jo hameñ pyār kartā hai, jis ne apne ḳhūn se hameñ hamāre gunāhoñ se ḳhalāsī baḳshī hai

<sup>6</sup> aur jis ne hamen shāhī ikhtiyār de kar apne Ḳhudā aur Bāp ke imām banā diyā hai. Use azal se abad tak jalāl aur qudrat hāsil rahe! Āmīn.

<sup>7</sup> Dekhen, wuh bādalon ke sāth ā rahā hai. Har ek use dekhegā, wuh bhī jinhon ne use chhedā thā. Aur duniyā kī tamām qaumen use dekh kar āh-o-zārī kareᅅgī. Hān, aisā hī ho! Āmīn.

<sup>8</sup> Rab Ḳhudā farmātā hai, “Maiñ Awwal aur Ākhir hūñ, wuh jo hai, jo thā aur jo āne wālā hai, yānī Qādir-e-mutlaq Ḳhudā.”

### *Masīh kī Royā*

<sup>9</sup> Maiñ Yūhannā āp kā bhāī aur sharīk-e-hāl hūñ. Mujh par bhī āp kī tarah zulm kiyā jā rahā hai. Maiñ āp ke sāth Allāh kī bādshāhī meñ sharīk hūñ aur Īsā meñ āp ke sāth sābitqadam rahtā hūñ. Mujhe Allāh kā kalām sunāne aur Īsā ke bāre meñ gawāhī dene kī wajah se is jazīre meñ jo Patmus kahlātā hai chhoᅇ diyā gayā.

<sup>10</sup> Rab ke din yānī Itwār ko maiñ Rūhul-quds kī girift meñ ā gayā aur maiñ ne apne pīchhe turam kī-sī ek ūnchī āwāz sunī.

<sup>11</sup> Us ne kahā, “Jo kuchh tū dekh rahā hai use ek kitāb meñ likh kar un sāt jamāton ko bhej denā jo Ifisus, Smurnā, Pīrgamun, Thuātīrā, Sardīs, Filadilfiyā aur Laudīkiyā meñ haiñ.”

<sup>12</sup> Maiñ ne bolne wāle ko dekhe ke lie apne pīchhe nazar ᅇālī to sone ke sāt shamādān dekhe.

<sup>13</sup> In shamādānon ke darmiyān koī khaᅇā thā jo Ibn-e-Ādam kī mānind thā. Us ne pānwoñ tak kā lambā choᅅhā pahan rakhā thā aur sīne par sone kā sīnāband bāndhā huā thā.

<sup>14</sup> Us kā sar aur bāl ūn yā barf jaise safed the aur us kī ānkheñ āg ke shole kī mānind thīñ.

<sup>15</sup> Us ke pāñw bhaṭṭe meñ damakte pītal kī mānind the aur us kī āwāz ābshār ke shor jaisī thī.

<sup>16</sup> Apne dahne hāth meñ us ne sāt sitāre thām rakhe the aur us ke muñh se ek tez aur dodhārī talwār nikal rahī thī. Us kā chehrā pūre zor se chamakne wāle sūraj kī tarah chamak rahā thā.

<sup>17</sup> Use dekhte hī maiñ us ke pāñwoñ meñ gir gayā. Maiñ murdā-sā thā. Phir us ne apnā dahnā hāth mujh par rakh kar kahā, “Mat ḍar. Maiñ Awwal aur Ākhir hūñ.

<sup>18</sup> Maiñ wuh hūñ jo zindā hai. Maiñ to mar gayā thā lekin ab dekh, maiñ abad tak zindā hūñ. Aur Maut aur Pātāl kī kunjyāñ mere hāth meñ haiñ.

<sup>19</sup> Chunāñche jo kuchh tū ne dekhā hai, jo abhī hai aur jo āindā hogā use likh de.

<sup>20</sup> Mere dahne hāth meñ sāt sitāroñ aur sāt shamādānoñ kā poshīdā matlab yih hai: Yih sāt sitāre Āsiyā kī sāt jamātoñ ke farishte haiñ, aur yih sāt shamādān yih sāt jamāteñ haiñ.

## 2

### *Ifisus ke lie Paighām*

<sup>1</sup> Ifisus meñ maujūd jamāt ke farishte ko yih likh denā: Yih us kā farmān hai jo apne dahne hāth meñ sāt sitāre thāme rakhtā aur sone ke sāt shamādānoñ ke darmiyān chaltā phirtā hai.

<sup>2</sup> Maiñ tere kāmoñ ko jāntā hūñ, terī saḡht mehnat aur terī sābitqadmī ko. Maiñ jāntā hūñ ki tū bure logoñ ko bardāsht nahīñ kar saktā, ki

tū ne un kī partāl kī hai jo rasūl hone kā dāwā karte haiñ, hālāñki wuh rasūl nahīñ haiñ. Tujhe to patā chal gayā hai ki wuh jhūṭe the.

<sup>3</sup> Tū mere nām kī khātir sābitqadam rahā aur bardāsht karte karte thakā nahīñ.

<sup>4</sup> Lekin mujhe tujh se yih shikāyat hai, tū mujhe us tarah pyār nahīñ kartā jis tarah pahle kartā thā.

<sup>5</sup> Ab khayāl kar ki tū kahāñ se gir gayā hai. Taubā karke wuh kuchh kar jo tū pahle kartā thā, warnā maiñ ā kar tere shamādān ko us kī jagah se haṭā dūngā.

<sup>6</sup> Lekin yih bāt tere haq meñ hai, tū merī tarah Nīkuliyoñ ke kāmōñ se nafrat kartā hai.

<sup>7</sup> Jo sun saktā hai wuh sun le ki Rūhul-quds jamātoñ ko kyā kuchh batā rahā hai.

Jo ghālib āegā use maiñ zindagī ke darakht kā phal khāne ko dūngā, us darakht kā phal jo Allāh ke firdaus meñ hai.

### *Smurnā ke lie Paiḡhām*

<sup>8</sup> Smurnā meñ maujūd jamāt ke farishte ko yih likh denā: Yih us kā farmān hai jo Awwal aur Ākhir hai, jo mar gayā thā aur dubārā zindā huā.

<sup>9</sup> Maiñ terī musibat aur ghurbat ko jāntā hūñ. Lekin haqīqat meñ tū daulatmand hai. Maiñ un logōñ ke buhtān se wāqif hūñ jo kahte haiñ ki wuh Yahūdī haiñ hālāñki haiñ nahīñ. Asal meñ wuh Iblīs kī jamāt haiñ.

<sup>10</sup> Jo kuchh tujhe jhelnā paṛegā us se mat ḍarnā. Dekh, Iblīs tujhe āzmāne ke lie tum meñ se bāz ko jel meñ ḍāl degā, aur das din tak tujhe izā pahuñchāī jāegī. Maut tak wafādār rah to maiñ tujhe zindagī kā tāj dūngā.

<sup>11</sup> Jo sun saktā hai wuh sun le ki Rūhul-quds jamātoñ ko kyā kuchh batā rahā hai.

Jo ghālib āegā use dūsri maut se nuqsān nahīn pahuñchegā.

### *Pirgamun ke lie Paiḡhām*

<sup>12</sup> Pirgamun meñ maujūd jamāt ke farishte ko yih likh denā:

Yih us kā farmān hai jis ke pās dodhārī tez talwār hai.

<sup>13</sup> Maiñ jāntā hūñ ki tū kahāñ rahtā hai, wahāñ jahāñ Iblīs kā taḡht hai. Tāham tū mere nām kā wafādār rahā hai. Tū ne un dinon meñ bhī mujh par imān rakhne kā inkār na kiyā jab merā wafādār gawāh Antipās tumhare pās shahīd huā, wahāñ jahāñ Iblīs bastā hai.

<sup>14</sup> Lekin mujhe tujh se kāī bātoñ kī shikāyat hai. Tere pās aise log haiñ jo Bilām kī tālīm kī pairawī karte haiñ. Kyonki Bilām ne Balaq ko sikhāyā ki wuh kis tarah Isrāīliyon ko gunāh karne par uksā saktā hai yāñī buton ko pesh kī gaī qurbāniyāñ khāne aur zinā karne se.

<sup>15</sup> Isī tarah tere pās bhī aise log haiñ, jo Nīkuliyon kī tālīm kī pairawī karte haiñ.

<sup>16</sup> Ab taubā kar! Warnā maiñ jald hī tere pās ā kar apne muñh kī talwār se un ke sāth laṛūngā.

<sup>17</sup> Jo sun saktā hai wuh sun le ki Rūhul-quds jamātoñ ko kyā kuchh batā rahā hai.

Jo ghālib āegā use maiñ poshīdā man meñ se dūngā. Maiñ use ek safed patthar bhī dūngā jis par ek nayā nām likhā hogā, aisā nām jo sirf milne wāle ko mālūm hogā.

### *Thuātīrā ke lie Paiḡhām*

18 Thuātīrā meñ maujūd jamāt ke farishte ko yih likh denā:

Yih Allāh ke Farzand kā farmān hai jis kī ānkheñ āg ke sholoñ aur pānw damakte pītal kī mānind haiñ.

19 Maiñ tere kāmoñ ko jāntā hūñ yānī terī muhabbat aur īmān, terī k̄hidmat aur sābitqadmī, aur yih ki is waqt tū pahle kī nisbat kahīñ zyādā kar rahā hai.

20 Lekin mujhe tujh se yih shikāyat hai, tū us aurat Īzabil ko jo apne āp ko nabiya kahtī hai kām karne detā hai, hālāñki yih apnī tālīm se mere k̄hādimoñ ko sahīh rāh se dūr karke unheñ zinā karne aur butoñ ko pesh kī gaī qurbāniyāñ khāne par uksātī hai.

21 Maiñ ne use kāfī der se taubā karne kā mauqā diyā hai, lekin wuh is ke lie taiyār nahīñ hai.

22 Chunāñche maiñ use yoñ mārūngā ki wuh bistar par paṛī rahegī. Aur agar wuh jo us ke sāth zinā kar rahe haiñ apnī ḡhalat harkatoñ se taubā na kareñ to maiñ unheñ shadīd musībat meñ phañsāūngā.

23 Hāñ, maiñ us ke farzandoñ ko mār dālūngā. Phir tamām jamāteñ jān leñgī ki maiñ hī zahnoñ aur diloñ ko parakhtā hūñ, aur maiñ hī tum meñ se har ek ko us ke kāmoñ kā badlā dūngā.

24 Lekin Thuātīrā kī jamāt ke aise log bhī haiñ jo is tālīm kī pairawī nahīñ karte, aur jinhoñ ne wuh kuchh nahīñ jānā jise in logoñ ne “Iblis ke gahre bhed” kā nām diyā hai. Tumheñ maiñ batātā hūñ ki maiñ tum par koī aur bojh nahīñ dālūngā.

<sup>25</sup> Lekin itnā zarūr karo ki jo kuchh tumhāre pās hai use mere āne tak mazbūtī se thāme rakhnā.

<sup>26</sup> Jo ghālib āegā aur ākhir tak mere kāmōn par qāym rahegā use main qāumōn par iḡhtiyār dūngā.

<sup>27</sup> Hāñ, wuh lohe ke shāhī asā se un par hukūmat karegā, unheñ miṭṭī ke bartanoñ kī tarah phoṛ dālegā.

<sup>28</sup> Yānī use wuhī iḡhtiyār milegā jo mujhe bhī apne Bāp se milā hai. Aise shaḡhs ko main subah kā sitārā bhī dūngā.

<sup>29</sup> Jo sun saktā hai wuh sun le ki Rūhul-quds jamātoñ ko kyā kuchh batā rahā hai.

### 3

#### *Sardīs ke lie Paiḡhām*

<sup>1</sup> Sardīs meñ maujūd jamāt ke farishte ko yih likh denā:

Yih us kā farmān hai jo Allāh kī sāt rūhoñ aur sāt sitāroñ ko apne hāth meñ thāme rakhtā hai. Main tere kāmōn ko jāntā hūñ. Tū zindā to kahlātā hai lekin hai murdā.

<sup>2</sup> Jāg uṭh. Jo bāqī rah gayā hai aur marne wālā hai use mazbūt kar. Kyoñki main ne tere kām apne Ḳhudā kī nazar meñ mukammal nahīn pāe.

<sup>3</sup> Chunāñche jo kuchh tujhe milā hai aur jo tū ne sunā hai use yād rakhnā. Use mahfūz rakh aur taubā kar. Agar tū bedār na ho to main chor kī tarah āūngā aur tujhe mālūm nahīn hogā ki main kab tujh par ān paṛūngā.

<sup>4</sup> Lekin Sardīs meñ tere kuchh aise log haiñ jinhoñ ne apne libās ālūdā nahīn kie. Wuh safed

kapre pahne hue mere sāth chaleñ-phireñge, kyoñki wuh is ke lāyq haiñ.

<sup>5</sup> Jo ghālib āegā wuh bhī un kī tarah safed kapre pahne hue phiregā. Maiñ us kā nām kitāb-e-hayāt se nahīñ miṭāūngā balki apne Bāp aur us ke farishton ke sāmne iqrār karūnga ki yih merā hai.

<sup>6</sup> Jo sun saktā hai wuh sun le ki Rūhul-quds jamāton ko kyā kuchh batā rahā hai.

### *Filadilfiyā ke lie Paiḡhām*

<sup>7</sup> Filadilfiyā meñ maujūd jamāt ke farishte ko yih likh denā:

Yih us kā farmān hai jo quddūs aur sachchā hai, jis ke hāth meñ Dāūd kī chābī hai. Jo kuchh wuh kholtā hai use koī band nahīñ kar saktā, aur jo kuchh wuh band kar detā hai use koī khol nahīñ saktā.

<sup>8</sup> Maiñ tere kāmon ko jāntā hūñ. Dekh, maiñ ne tere sāmne ek aisā darwāzā khol rakhā hai jise koī band nahīñ kar saktā. Mujhe mālūm hai ki terī tāqat kam hai. Lekin tū ne mere kalām ko mahfūz rakhā hai aur mere nām kā inkār nahīñ kiya.

<sup>9</sup> Dekh, jahān tak un kā tālluq hai jo Iblīs kī jamāt se haiñ, wuh jo Yahūdī hone kā dāwā karte haiñ hālāñki wuh jhūṭ bolte haiñ, maiñ unheñ tere pās āne dūngā, unheñ tere pānwoñ meñ jhuk kar yih taslīm karne par majbūr karūnga ki maiñ ne tujhe pyār kiya hai.

<sup>10</sup> Tū ne merā sābitqadam rahne kā hukm pūrā kiya, is lie maiñ tujhe āzmāish kī us gharī se bachāe rakhūngā jo pūrī duniyā par ā kar us meñ basne wālon ko āzmāegī.



<sup>11</sup> Maiñ jald ā rahā hūñ. Jo kuchh tere pās hai use mazbūtī se thāme rakhnā tāki koī tujh se terā tāj chhīn na le.

<sup>12</sup> Jo ghālib āegā use maiñ apne Ḳhudā ke ghar meñ satūn banāūngā, aisā satūn jo use kabhī nahīn chhoṛegā. Maiñ us par apne Ḳhudā kā nām aur apne Ḳhudā ke shahr kā nām likh dūngā, us nae Yarūshalam kā nām jo mere Ḳhudā ke hāñ se utarne wālā hai. Hāñ, maiñ us par apnā nayā nām bhī likh dūngā.

<sup>13</sup> Jo sun saktā hai wuh sun le ki Rūhul-quds jamātoñ ko kyā kuchh batā rahā hai.

### *Laudikiyā ke lie Paighām*

<sup>14</sup> Laudikiyā meñ maujūd jamāt ke farishte ko yih likh denā:

Yih us kā farmān hai jo Āmīn hai, wuh jo wafādār aur sachchā gawāh aur Allāh kī kāynāt kā mambā hai.

<sup>15</sup> Maiñ tere kāmoñ ko jāntā hūñ. Tū na to sard hai, na garm. Kāsh tū in meñ se ek hotā!

<sup>16</sup> Lekin chūnki tū nīmgarm hai, na garm, na sard, is lie maiñ tujhe qai karke apne muñh se nikāl phaiñkūngā.

<sup>17</sup> Tū kahtā hai, “Maiñ amīr hūñ, maiñ ne bahut daulat hāsīl kar lī hai aur mujhe kisī bhī chīz kī zarūrat nahīn.” Aur tū nahīn jāntā ki tū asal meñ badbaḳht, qābil-e-rahm, ghārib, andhā aur nangā hai.

<sup>18</sup> Maiñ tujhe mashwarā detā hūñ ki mujh se āg meñ ḳhālis kiyā gayā sonā ḳharīd le. Tab hī tū daulatmand banegā. Aur mujh se safed libās ḳharīd le jis ko pahnane se tere nangepan

kī sharm zāhir nahīn hogī. Is ke alāwā mujh se ānkhon meñ lagāne ke lie marham kharīd le tāki tū dekh sake.

<sup>19</sup> Jīn ko main pyār kartā hūn un kī main sazā de kar tarbiyat kartā hūn. Ab sanjidā ho jā aur taubā kar.

<sup>20</sup> Dekh, main darwāze par kharā khatkhatā rahā hūn. Agar koī merī āwāz sun kar darwāzā khole to main andar ā kar us ke sāth khānā khāūngā aur wuh mere sāth.

<sup>21</sup> Jo ghālib āe use main apne sāth apne taht par baiṭhne kā haq dūngā, bilkul usī tarah jis tarah main khud bhī ghālib ā kar apne Bāp ke sāth us ke taht par baiṭh gayā.

<sup>22</sup> Jo sun saktā hai wuh sun le ki Rūhul-quds jamāton ko kyā kuchh batā rahā hai.”

## 4

### *Āsmān par Allāh kī Parastish*

<sup>1</sup> Is ke bād main ne dekhā ki āsmān meñ ek darwāzā khulā huā hai aur turam kī-sī āwāz ne jo main ne pahle sunī thī kahā, “Idhar upar ā. Phir main tujhe wuh kuchh dikhāūngā jise is ke bād pesh ānā hai.”

<sup>2</sup> Tab Rūhul-quds ne mujhe fauran apnī girift meñ le liyā. Wahān āsmān par ek taht thā jis par koī baiṭhā thā.

<sup>3</sup> Aur baiṭhne wālā dekhne meñ yashab aur aqīq se mutābiqat rakhtā thā. Taht ke irdgird qaus-e-quzah thī jo dekhne meñ zumurrad kī mānind thī.

<sup>4</sup> Yih taḡht 24 taḡhton se ghirā huā thā jin par 24 buzurg baiṡhe the. Buzurgoṅ ke libās safed the aur har ek ke sar par sone kā tāj thā.

<sup>5</sup> Darmiyānī taḡht se bijlī kī chamkeṅ, āwāzeṅ aur bādāl kī garjeṅ nikal rahī thīṅ. Aur taḡht ke sāmne sāt mashāleṅ jal rahī thīṅ. Yih Allāh kī sāt rūh haiṅ.

<sup>6</sup> Takht ke sāmne shīshe kā-sā samundar bhī thā jo billaur se mutābiqat rakhtā thā.

Bīch meṅ taḡht ke irdgird chār jāndār the jin ke jismoṅ par har jagah āṅkheṅ hī āṅkheṅ thīṅ, sāmne wāle hisse par bhī aur pīchhe wāle hisse par bhī.

<sup>7</sup> Pahlā jāndār sherbabar jaisā thā, dūsrā bail jaisā, tīsre kā insān jaisā chehrā thā aur chauthā urṡe hue uḡāb kī mānind thā.

<sup>8</sup> In chār jāndāroṅ meṅ se har ek ke chhiḡ par the aur jism par har jagah āṅkheṅ hī āṅkheṅ thīṅ, bāhar bhī aur andar bhī. Din rāt wuh bilānāghā kahte rahte haiṅ,

“Quddūs, quddūs, quddūs hai Rab Qādir-e-mutlaq Ḳhudā,

jo thā, jo hai aur jo āne wālā hai.”

<sup>9</sup> Yoṅ yih jāndār us kī tamjīd, izzat aur shukr karte haiṅ jo taḡht par baiṡhā hai aur abad tak zindā hai. Jab bhī wuh yih karte haiṅ

<sup>10</sup> to 24 buzurg taḡht par baiṡhne wāle ke sāmne muḡh ke bal ho kar use sijdā karte haiṅ jo azal se abad tak zindā hai. Sāth sāth wuh apne sone ke tāj taḡht ke sāmne rakh kar kahte haiṅ,

<sup>11</sup> “Ai Rab hamāre Ḳhudā,

tū jalāl, izzat aur qudrat ke lāyḡ hai.

Kyoṅki tū ne sab kuchh ḡhalaḡ kiyā.

Tamām chīzeñ terī hī marzī se thīñ aur paidā huīñ.”

## 5

### *Sāt Muhroñ Wālā Tūmār*

<sup>1</sup> Phir main ne takht par baiṭhne wāle ke dahne hāth meñ ek tūmār dekhā jis par donoñ taraf likhā huā thā aur jis par sāt muhreñ lagī thīñ.

<sup>2</sup> Aur main ne ek tāqatwar farishtā dekhā jis ne ūñchī āwāz se elān kiyā, “Kaun muhroñ ko toṛ kar tūmār ko kholne ke lāyq hai?”

<sup>3</sup> Lekin na āsmān par, na zamīn par aur na zamīn ke nīche koī thā jo tūmār ko khol kar us meñ nazar ḍāl saktā.

<sup>4</sup> Main khūb ro parā, kyonki koī is lāyq na pāyā gayā ki wuh tūmār ko khol kar us meñ nazar ḍāl saktā.

<sup>5</sup> Lekin buzurgoñ meñ se ek ne mujh se kahā, “Mat ro. Dekh, Yahūdāh qabile ke Sherbabar aur Dāūd kī Jaṛ ne fatah pāī hai, aur wuhī tūmār kī sāt muhroñ ko khol saktā hai.”

<sup>6</sup> Phir main ne ek Lelā dekhā jo takht ke darmiyān kharā thā. Wuh chār jāndāroñ aur buzurgoñ se ghirā huā thā aur yoñ lagtā thā ki use zabah kiyā gayā ho. Us ke sāt sīng aur sāt āñkheñ thīñ. In se murād Allāh kī wuh sāt rūh haiñ jinheñ duniyā kī har jagah bhejā gayā hai.

<sup>7</sup> Lele ne ā kar takht par baiṭhne wāle ke dahne hāth se tūmār ko le liyā.

<sup>8</sup> Aur lete waqt chār jāndār aur 24 buzurg Lele ke sāmne muñh ke bal gir gae. Har ek ke pās ek

sarod aur baḥhūr se bhare sone ke pyāle the. In se murād muḡaddasīn kī duāeñ haiñ.

<sup>9</sup> Sāth sāth wuh ek nayā gīt gāne lage,

“Tū tūmār ko le kar

us kī muhroñ ko kholne ke lāyq hai.

Kyoñki tujhe zabah kiyā gayā, aur apne ḡhūn se

tū ne logoñ ko har qabīle, har ahl-e-zabān, har millat aur har qaum se

Allāh ke lie ḡharīd liyā hai.

<sup>10</sup> Tū ne unheñ shāhī iḡhtiyār de kar

hamāre Ḳhudā ke imām banā diyā hai.

Aur wuh duniyā meñ hukūmat karenge.”

<sup>11</sup> Maiñ ne dubārā dekhā to beshumār farish-ton kī āwāz sunī. Wuh taḡht, chār jāndāroñ aur buzurgoñ ke irdgird khaḡe

<sup>12</sup> ūñchī āwāz se kah rahe the,

“Lāyq hai wuh Lelā jo zabah kiyā gayā hai.

Wuh qudrat, daulat, hikmat aur tāqat,

izzat, jalāl aur satāish pāne ke lāyq hai.”

<sup>13</sup> Phir maiñ ne āsmān par, zamīn par, zamīn ke nīche aur samundar kī har maḡhlūq kī āwāzeñ sunīñ. Hāñ, kāynāt kī sab maḡhlūqāt yih gā rahe the,

“Taḡht par baiḡhne wāle aur Lele kī satāish aur izzat,

jalāl aur qudrat azal se abad tak rahe.”

<sup>14</sup> Chār jāndāroñ ne jawāb meñ “Āmīn” kahā, aur buzurgoñ ne gir kar sijdā kiyā.

## 6

*Muhreñ Toḡrī Jātī Haiñ*

<sup>1</sup> Phir main ne dekhā, Lele ne sāt muhron meñ se pahlī muhr ko kholā. Is par main ne chār jāndāron meñ se ek ko jis kī āwāz karakte bādalon kī mānind thī yih kahte hue sunā, “Ā!”

<sup>2</sup> Mere dekhte dekhte ek safed ghorā nazar āyā. Us ke sawār ke hāth meñ kamān thī, aur use ek tāj diyā gayā. Yoñ wuh fāteh kī haisiyat se aur fatah pāne ke lie wahān se niklā.

<sup>3</sup> Lele ne dūsri muhr kholī to main ne dūsre jāndār ko kahte hue sunā ki “Ā!”

<sup>4</sup> Is par ek aur ghorā niklā jo āg jaisā surkh thā. Us ke sawār ko duniyā se sulah-salāmātī chhīnane kā iḳhtiyār diyā gayā tāki log ek dūsre ko qatl karen. Use ek baṛī talwār pakaṛāī gāī.

<sup>5</sup> Lele ne tīsri muhr kholī to main ne tīsre jāndār ko kahte hue sunā ki “Ā!” Mere dekhte dekhte ek kālā ghorā nazar āyā. Us ke sawār ke hāth meñ tarāzū thā.

<sup>6</sup> Aur main ne chāron jāndāron meñ se goyā ek āwāz sunī jis ne kahā, “Ek din kī mazdūrī ke lie ek kilogrām gandum, aur ek din kī mazdūrī ke lie tīn kilogrām jau. Lekin tel aur mai ko nuqsān mat pahuñchānā.”

<sup>7</sup> Lele ne chauthī muhr kholī to main ne chauthe jāndār ko kahte sunā ki “Ā!”

<sup>8</sup> Mere dekhte dekhte ek ghorā nazar āyā jis kā rang halkā pīlā-sā thā. Us ke sawār kā nām Maut thā, aur Pātāl us ke pīchhe pīchhe chal rahī thī. Unheñ zamīn kā chauthā hissā qatl karne kā iḳhtiyār diyā gayā, ḳhāh talwār, kāl, mohlak wabā yā wahshī jānwaron ke zariye se ho.

9 Lele ne pānchwiñ muhr kholī to main ne qurbāngāh ke nīche un kī rūh dekhīn jo Allāh ke kalām aur apnī gawāhī qāym rakhne kī wajah se shahīd ho gae the.

10 Unhoñ ne ūnchī āwāz se chillā kar kahā, “Ai Qādir-e-mutlaq, quddūs aur sachche Rab, kitnī der aur lagegī? Tū kab tak zamīn ke bāshindoñ kī adālat karke hamāre shahīd hone kā intaqām na legā?”

11 Tab un meñ se har ek ko ek safed libās diyā gayā, aur unheñ samjhāyā gayā ki “Mazīd thoṛī der ārām karo, kyonki pahle tumhāre hamkhidmat bhāiyōñ meñ se utnoñ ko shahīd ho jānā hai jitnoñ ke lie yih muqarrar hai.”

12 Lele ne chhaṭī muhr kholī to main ne ek shadīd zalzalā dekhā. Sūraj bakrī ke bāloñ se bane ṭāṭ kī mānind kālā ho gayā, pūrā chānd khūn jaisā nazar āne lagā

13 aur āsmān ke sitāre zamīn par yoñ gir gae jis tarah anjīr ke daraḳht par lage ākhirī anjīr tez hawā ke jhoñkoñ se gir jāte haiñ.

14 Āsmān tūmār kī tarah jab use lapeṭ kar band kiyā jātā hai pīchhe haṭ gayā. Aur har pahār aur jazīrā apnī apnī jagah se khisak gayā.

15 Phir zamīn ke bādshāh, shahzāde, jarnail, amīr, asar-o-rasūkh wāle, ghulām aur āzād sab ke sab ghāroñ meñ aur pahārī chaṭṭānoñ ke darmiyān chhup gae.

16 Unhoñ ne chillā kar pahāroñ aur chaṭṭānoñ se minnat kī, “Ham par gir kar hameñ taḳht par baiṭhe hue ke chehre aur Lele ke ghazab se chhupā lo.

17 Kyoñki un ke ġhazab kā azīm din ā gayā hai, aur kaun qāym rah saktā hai?”

## 7

### *Isrāil ke 1,44,000 Chune Hue Afrād*

<sup>1</sup> Is ke bād maiñ ne chār farishton ko zamīn ke chār konoñ par khaṛe dekhā. Wuh zamīn kī chār hawāoñ ko chalne se rok rahe the tāki na zamīn par, na samundar yā kisī daraḳht par koī hawā chale.

<sup>2</sup> Phir maiñ ne ek aur farishtā mashriq se chaṛhte hue dekhā jis ke pās zindā Ḳhudā kī muhr thī. Us ne ūñchī āwāz se un chār farishton se bāt kī jinheñ zamīn aur samundar ko nuqsān pahuñchāne kā iḳhtiyār diyā gayā thā. Us ne kahā,

<sup>3</sup> “Zamīn, samundar yā daraḳhton ko us waqt tak nuqsān mat pahuñchānā jab tak ham apne Ḳhudā ke ḳhādimoñ ke māthoñ par muhr na lagā leñ.”

<sup>4</sup> Aur maiñ ne sunā ki jin par muhr lagāi gāi thī wuh 1,44,000 afrād the aur wuh Isrāil ke har ek qābile se the:

<sup>5</sup> 12,000 Yahūdāh se, 12,000 Rūbin se, 12,000 Jad se,

<sup>6</sup> 12,000 Āshar se, 12,000 Naftālī se, 12,000 Manassī se,

<sup>7</sup> 12,000 Shamāūn se, 12,000 Lāwī se, 12,000 Ishkār se,

<sup>8</sup> 12,000 Zabūlūn se, 12,000 Yūsuf se aur 12,000 Binyamīn se.

### *Allāh ke Huzūr Ek Baṛā Hujūm*



<sup>9</sup> Is ke bād main ne ek hujūm dekhā jo itnā baṛā thā ki use ginā nahīn jā saktā thā. Us meñ har millat, har qabīle, har qaum aur har zabān ke afrād safed libās pahne hue taḡht aur Lele ke sāmne khare the. Un ke hāthoñ meñ khajūr kī ḡaliyāñ thīñ.

<sup>10</sup> Aur wuh ūñchī āwāz se chillā chillā kar kah rahe the, “Najāt taḡht par baiṭhe hue hamāre Ḳhudā aur Lele kī taraf se hai.”

<sup>11</sup> Tamām farishte taḡht, buzurgoñ aur chār jāndāroñ ke irdgird khare the. Unhoñ ne taḡht ke sāmne gir kar Allāh ko sijdā kiyā

<sup>12</sup> aur kahā, “Āmīn! Hamāre Ḳhudā kī azal se abad tak satāish, jalāl, hikmat, shukrguzārī, izzat, qudrat aur tāqat hāsīl rahe. Āmīn!”

<sup>13</sup> Buzurgoñ meñ se ek ne mujh se pūchhā, “Safed libās pahne hue yih log kaun haiñ aur kahāñ se āe haiñ?”

<sup>14</sup> Main ne jawāb diyā, “Mere āqā, āp hī jānte haiñ.”

Us ne kahā, “Yih wuhī haiñ jo baṛī īzārasānī se nikal kar āe haiñ. Unhoñ ne apne libās Lele ke ḡhūn meñ dho kar safed kar lie haiñ.

<sup>15</sup> Is lie wuh Allāh ke taḡht ke sāmne khare haiñ aur din rāt us ke ghar meñ us kī ḡhidmat karte haiñ. Aur taḡht par baiṭhā huā un ko panāh degā.

<sup>16</sup> Is ke bād na kabhī bhūk unheñ satāegī na pyās. Na dhūp, na kisī aur qism kī taptī garmī unheñ jhulsāegī.

<sup>17</sup> Kyoñki jo Lelā taḡht ke darmiyān baiṭhā hai wuh un kī gallābānī karegā aur unheñ zindagī

ke chashmoñ ke pās le jāegā. Aur Allāh un kī ānkhon se tamām ānsū poñchh ḍālegā.”

## 8

### *Sātwīn Muhr*

<sup>1</sup> Jab Lele ne sātwīn muhr kholī to āsmān par ḵhāmoshī chhā gaī. Yih ḵhāmoshī taqriban ādhe ghañte tak rahī.

<sup>2</sup> Phir main ne Allāh ke sāmne khare sāt farishton ko dekhā. Unheñ sāt turam die gae.

<sup>3</sup> Ek aur farishtā jis ke pās sone kā baḵhūrdān thā ā kar qurbāngāh ke pās khare ho gayā. Use bahut-sā baḵhūr diyā gayā tāki wuh use muqaddasīn kī duāon ke sāth taḵht ke sāmne kī sone kī qurbāngāh par pesh kare.

<sup>4</sup> Baḵhūr kā dhuān muqaddasīn kī duāon ke sāth farishte ke hāth se uḥte uḥte Allāh ke sāmne pahuñchā.

<sup>5</sup> Phir farishte ne baḵhūrdān ko liyā aur use qurbāngāh kī āg se bhar kar zamīn par phaiñk diyā. Tab karaktī aur garajtī āwāzeñ sunāī dīñ, bijlī chamakne lagī aur zalzalā ā gayā.

### *Turamon kā Asar*

<sup>6</sup> Phir jin sāt farishton ke pās sāt turam the wuh unheñ bajāne ke lie taiyār hue.

<sup>7</sup> Pahle farishte ne apne turam ko bajā diyā. Is par ole aur ḵhūn ke sāth milāī gaī āg paidā ho kar zamīn par barsāī gaī. Is se zamīn kā tīsrā hissā, daraḵhton kā tīsrā hissā aur tamām harī ghās bhasm ho gaī.

<sup>8</sup> Phir dūsre farishte ne apne turam meñ phūñk māri. Is par jaltī huī ek baḍī pahārnumā

chīz ko samundar meñ phaiñkā gayā. Samundar kā tīsrā hissā khūn meñ badal gayā,

<sup>9</sup> samundar meñ maujūd zindā maḥlūqāt kā tīsrā hissā halāk aur baharī jahāzōñ kā tīsrā hissā tabāh ho gayā.

<sup>10</sup> Phir tīsre farishte ne apne turam meñ phūñk mārī. Is par mashāl kī tarah bhaṛaktā huā ek baṛā sitārā āsmān se dariyāōñ ke tīsre hisse aur pāñī ke chashmoñ par gir gayā.

<sup>11</sup> Is sitāre kā nām Afsantīn thā aur is se pāñī kā tīsrā hissā afsantīn jaisā karwā ho gayā. Bahut-se log yih karwā pāñī pīne se mar gae.

<sup>12</sup> Phir chauthe farishte ne apne turam meñ phūñk mārī. Is par sūraj kā tīsrā hissā, chāñd kā tīsrā hissā aur sitāroñ kā tīsrā hissā raushnī se mahrūm ho gayā. Dīn kā tīsrā hissā raushnī se mahrūm huā aur isī tarah rāt kā tīsrā hissā bhī.

<sup>13</sup> Phir dekhte dekhte maiñ ne ek uqāb ko sunā jis ne mere sar ke ūpar hī bulandiyōñ par ūrte hue ūñchī āwāz se pukārā, “Afsos! Afsos! Zamīn ke bāshindoñ par afsos! Kyōñki tīn farishtoñ ke turamoñ kī āwāzeñ abhī bāqī haiñ.”

## 9

<sup>1</sup> Phir pāñchweñ farishte ne apne turam meñ phūñk mārī. Is par maiñ ne ek sitārā dekhā jo āsmān se zamīn par gir gayā thā. Is sitāre ko athāh gaṛhe ke rāste kī chābī dī gai.

<sup>2</sup> Us ne athāh gaṛhe kā rāstā khol diyā to us se dhuāñ nikal kar ūpar āyā, yoñ jaise dhuāñ kisī baṛe bhaṭte se nikaltā hai. Sūraj aur chāñd athāh gaṛhe ke is dhueñ se tārīk ho gae.

<sup>3</sup> Aur dhueñ meñ se ṭiḍḍiyāñ nikal kar zamīn par utar āīñ. Unheñ zamīn ke bichchhuoñ jaisā iḡhtiyār diyā gayā.

<sup>4</sup> Unheñ batāyā gayā, “Na zamīn kī ghās, na kisī paude yā daraḡht ko nuqsān pahuñchāo balki sirf un logoñ ko jin ke māthoñ par Allāh kī muhr nahīn lagī hai.”

<sup>5</sup> Ṭiḍḍiyōñ ko in logoñ ko mār ḍalne kā iḡhtiyār na diyā gayā balki unheñ batāyā gayā ki wuh pāñch mahīnoñ tak in ko aziyat deñ. Aur yih aziyat us taklīf kī mānind hai jo tab paidā hotī hai jab bichchhū kisī ko ḍanak mārṭā hai.

<sup>6</sup> Un pāñch mahīnoñ ke daurān log maut kī talāsh meñ raheñge, lekin use pāeñge nahīn. Wuh mar jāne kī shadīd ārzū kareñge, lekin maut un se bhāg kar dūr rahegī.

<sup>7</sup> Ṭiḍḍiyōñ kī shakl-o-sūrat jang ke lie taiyār ghoṛoñ kī mānind thī. Un ke saroñ par sone ke tājoñ jaisī chīzeñ thīñ aur un ke chehre insānoñ ke chehroñ kī mānind the.

<sup>8</sup> Un ke bāl ḡhawātīn ke bāloñ kī mānind aur un ke dānt sherbabar ke dāntoñ jaise the.

<sup>9</sup> Yoñ lagā jaise un ke sīnoñ par lohe ke-se zirābaktar lage hue the, aur un ke parōñ kī āwāz beshumār rathoñ aur ghoṛoñ ke shor jaisī thī jab wuh muḡhālīf par jhapaṭ rahe hote hoñ.

<sup>10</sup> Un kī dum par bichchhū kā-sā ḍanak lagā thā aur unheñ inhīñ dumoñ se logoñ ko pāñch mahīnoñ tak nuqsān pahuñchāne kā iḡhtiyār thā.

<sup>11</sup> Un kā bādshāh athāh garḡhe kā farishtā hai jis kā Ibrānī nām Abaddon aur Yūnānī nām Apulliyon (Halākū) hai.

<sup>12</sup> Yoñ pahlā afsos guzar gayā, lekin is ke bād do mazīd afsos hone wāle haiñ.

<sup>13</sup> Chhaṭe farishte ne apne turam meñ phūnk māri. Is par maiñ ne ek āwāz sunī jo Allāh ke sāmne wāqe sone kī qurbāngāh ke chār konoñ par lage sīngoñ se āi.

<sup>14</sup> Is āwāz ne chhaṭā turam pakare hue farishte se kahā, “Un chār farishton ko khulā chhoṛ denā jo bare dariyā banām Furāt ke pās bandhe hue haiñ.”

<sup>15</sup> In chār farishton ko isī mahīne ke isī din ke isī ghante ke lie taiyār kiyā gayā thā. Ab inheñ khulā chhoṛ diyā gayā tāki wuh insānoñ kā tīsrā hissā mār dāleñ.

<sup>16</sup> Mujhe batāyā gayā ki ghoṛoñ par sawār fauji bīs karoṛ the.

<sup>17</sup> Royā meñ ghoṛe aur sawār yoñ nazar āe: sīnoñ par lage zirābaktar āg jaise surkh, nīle aur gandhak jaise pile the. Ghoṛoñ ke sar sherbabar ke saroñ se mutābiqat rakhte the aur un ke muñh se āg, dhuāñ aur gandhak nikalti thī.

<sup>18</sup> Āg, dhueñ aur gandhak kī in tīn balāoñ se insānoñ kā tīsrā hissā halāk huā.

<sup>19</sup> Har ghoṛe kī tāqat us ke muñh aur dum meñ thī, kyoñki un kī dumeñ sānp kī mānind thīñ jin ke sar nuqsān pahuñchāte the.

<sup>20</sup> Jo in balāoñ se halāk nahīn hue the balki abhī bāqī the unhoñ ne phir bhī apne hāthoñ ke kāmōñ se taubā na kī. Wuh badrūhoñ aur sone, chāñdī, pītal, patthar aur lakaṛī ke butoñ kī pūjā se bāz na āe hālāñki aisī chīzeñ na to dekh saktī haiñ, na sunane yā chalne ke qābil hotī haiñ.

<sup>21</sup> Wuh qatl-o-ghārat, jādūgarī, zinākārī aur choriyoñ se bhī taubā karke bāz na āe.

# 10

## *Farishtā aur Chhoṭā Tūmār*

<sup>1</sup> Phir main ne ek aur tāqatwar farishtā dekhā. Wuh bādāl orhe hue āsmān se utar rahā thā aur us ke sar ke ūpar qaus-e-quzah thī. Us kā chehrā sūraj jaisā thā aur us ke pānw āg ke satūn jaise.

<sup>2</sup> Us ke hāth meñ ek chhoṭā tūmār thā jo khulā thā. Apne ek pānw ko us ne samundar par rakh diyā aur dūsre ko zamīn par.

<sup>3</sup> Phir wuh ūnchī āwāz se pukār uṭhā. Aise lagā jaise sherbabar garaj rahā hai. Is par karak kī sāt āwāzeñ bolne lagiñ.

<sup>4</sup> Un ke bolne par main un kī bāteñ likhne ko thā ki ek āwāz ne kahā, “Karak kī sāt āwāzoñ kī bātoñ par muhr lagā aur unheñ mat likhnā.”

<sup>5</sup> Phir us farishte ne jise main ne samundar aur zamīn par kharā dekhā apne dahne hāth ko āsmān kī taraf uṭhā kar

<sup>6</sup> Allāh ke nām kī qasam khāī, us ke nām kī jo azal se abad tak zindā hai aur jis ne āsmānoñ, zamīn aur samundar ko un tamām chīzoñ samet khalāq kiyā jo un meñ haiñ. Farishte ne kahā, “Ab der nahīn hogī.

<sup>7</sup> Jab sātwan farishtā apne turam meñ phūnk mārne ko hogā tab Allāh kā bhed jo us ne apne nabuwwat karne wāle khādimoñ ko batāyā thā takmil tak pahuñchegā.”

<sup>8</sup> Phir jo āwāz āsmān se sunāī dī thī us ne ek bār phir mujh se bāt kī, “Jā, wuh tūmār le lenā jo samundar aur zamīn par kharē farishte ke hāth meñ khulā paṛā hai.”

<sup>9</sup> Chunānche main ne farishte ke pās jā kar us se guzārish kī ki wuh mujhe chhoṭā tūmār de. Us ne mujh se kahā, “Ise le aur khā le. Yih tere muñh meñ shahd kī tarah mīṭhā lagegā, lekin tere mede meñ karwāhaṭ paidā karegā.”

<sup>10</sup> Main ne chhoṭe tūmār ko farishte ke hāth se le kar use khā liyā. Mere muñh meñ to wuh shahd kī tarah mīṭhā lag rahā thā, lekin mede meñ jā kar us ne karwāhaṭ paidā kar dī.

<sup>11</sup> Phir mujhe batāyā gayā, “Lāzim hai ki tū bahut ummatoñ, qaumoñ, zabānoñ aur bādshāhoñ ke bāre meñ mazīd nabuwwat kare.”

## 11

### *Do Gawāh*

<sup>1</sup> Mujhe gaz kī tarah kā sarkandā diyā gayā aur batāyā gayā, “Jā, Allāh ke ghar aur qurbāngāh kī paimāish kar. Us meñ parastāroñ kī tādād bhī gīn.

<sup>2</sup> Lekin bairūnī sahan ko chhoṛ de. Use mat nāp, kyoñki use ḡhairīmāndāroñ ko diyā gayā hai jo muqaddas shahr ko 42 mahīnoñ tak kuchalte raheñge.

<sup>3</sup> Aur main apne do gawāhoñ ko iḡhtiyār dūngā, aur wuh ṭāṭ oṛh kar 1,260 dīnoñ ke daurān nabuwwat kareñge.”

<sup>4</sup> Yih do gawāh zaitūn ke wuh do daraḡht aur wuh do shamādān haiñ jo duniyā ke āqā ke sāmne khaṛe haiñ.

<sup>5</sup> Agar koī unheñ nuqsān pahuñchānā chāhe to un ke muñh meñ se āg nikal kar un ke dushmanoñ ko bhasm kar detī hai. Jo bhī unheñ

nuqsān pahuñchānā chāhe use is tarah marnā partā hai.

<sup>6</sup> In gawāhoñ ko āsmān ko band rakhne kā iḡhtiyār hai tāki jitnā waqt wuh nabuwwat karen̄ bārish na ho. Unheñ pānī ko ḡhūn meñ badalne aur zamīn ko har qism kī aziyat pahuñchāne kā iḡhtiyār bhī hai. Aur wuh jitnī dafā jī chāhe yih kar sakte haiñ.

<sup>7</sup> Un kī gawāhī kā muqarrarā waqt pūrā hone par athāh gaḡhe meñ se nikalne wālā haiwān un se jang karnā shurū karegā aur un par ḡhālib ā kar unheñ mār ḡālegā.

<sup>8</sup> Un kī lāsheñ us baḡe shahr kī saḡak par paḡī raheḡī jis kā alāmatī nām Sadūm aur Misr hai. Wahān un kā āḡā bhī maslūb huā thā.

<sup>9</sup> Aur sārhe tīn dinoñ ke daurān har ummat, qabīle, zabān aur qaum ke log in lāshoñ ko ḡhūr kar dekheḡe aur inheñ dafn karne nahīn deḡe.

<sup>10</sup> Zamīn ke bāshinde un kī wajah se masrūr hoḡe aur ḡhushī manā kar ek dūsre ko tohfe bhejeḡe, kyoñki in do nabiyoñ ne zamīn par rahne wāloñ ko kāfī īzā pahuñchāī thī.

<sup>11</sup> Lekin in sārhe tīn dinoñ ke bād Allāh ne un meñ zindagī kā dam phūnk diyā, aur wuh apne pānwoñ par khare hue. Jo unheñ dekh rahe the wuh saḡht dahshatzadā hue.

<sup>12</sup> Phir unhoñ ne āsmān se ek ūñchī āwāz sunī jis ne un se kahā, “Yahān ūpar āo!” Aur un ke dushmanoñ ke deḡhte deḡhte donoñ ek bādal meñ āsmān par chale gae.

<sup>13</sup> Usī waqt ek shadīd zalzalā āyā aur shahr kā daswān hissā gir kar tabāh ho gayā. 7,000 afrād



us kī zad meñ ā kar mar gae. Bache hue logon meñ dahshat phail gaī aur wuh āsmān ke Ḳhudā ko jalāl dene lage.

<sup>14</sup> Dūsrā afsos guzar gayā, lekin ab tīsrā afsos jald hone wālā hai.

### *Sātwan Turam*

<sup>15</sup> Sātweñ farishte ne apne turam meñ phūnk mārī. Is par āsmān par se ūnchī āwazeñ sunāi deñ jo kah rahī thīñ, “Zamīn kī bādshāhī hamāre āqā aur us ke Masīh kī ho gaī hai. Wuhī azal se abad tak hukūmat karegā.”

<sup>16</sup> Aur Allāh ke takht ke sāmne baiṭhe 24 buzurgoñ ne gir kar Allāh ko sijdā kiyā

<sup>17</sup> aur kahā, “Ai Rab Qādir-e-mutlaq Ḳhudā, ham terā shukr karte haiñ, tū jo hai aur jo thā. Kyonki tū apnī azīm qudrat ko kām meñ lā kar hukūmat karne lagā hai.

<sup>18</sup> Qaumeñ ḡhusse meñ āīn to terā ḡhazab nāzil huā. Ab murdoñ kī adālat karne aur apne ḡhādimoñ ko ajr dene kā waqt ā gayā hai. Hāñ, tere nabiyon, muḡaddasīn aur terā ḡhauf mānane wāloñ ko ajr milegā, ḡhāh wuh chhoṭe hoñ yā baṛe. Ab wuh waqt bhī ā gayā hai ki zamīn ko tabāh karne wāloñ ko tabāh kiyā jāe.”

<sup>19</sup> Āsmān par Allāh ke ghar ko kholā gayā aur us meñ us ke ahd kā sandūq nazar āyā. Bijlī chamakne lagī, shor mach gayā, bādāl garajne aur baṛe baṛe ole paṛne lage.

## 12

### *Ḳhātūn aur Azhdahā*

<sup>1</sup> Phir āsmān par ek azīm nishān zāhir huā, ek ḳhātūn jis kā libās sūraj thā. Us ke pānwoñ tale chānd aur sar par bārah sitāroñ kā tāj thā.

<sup>2</sup> Us kā pānw bhārī thā, aur janm dene ke shadīd dard meñ mubtalā hone kī wajah se wuh chillā rahī thī.

<sup>3</sup> Phir āsmān par ek aur nishān nazar āyā, ek baṛā aur āg jaisā surḳh azhdahā. Us ke sāt sar aur das siñg the, aur har sar par ek tāj thā.

<sup>4</sup> Us kī dum ne sitāroñ ke tīsre hisse ko āsmān par se utār kar zamīn par phaiñk diyā. Phir azhdahā janm dene wālī ḳhātūn ke sāmne khaṛā huā tāki us bachche ko janm lete hī haṛap kar le.

<sup>5</sup> Ḳhātūn ke beṭā paidā huā, wuh bachchā jo lohe ke shāhī asā se qaumoñ par hukūmat karegā. Aur ḳhātūn ke is bachche ko chhīn kar Allāh aur us ke taḳht ke sāmne lāyā gayā.

<sup>6</sup> Ḳhātūn ḳhud registān meñ hijrat karke ek aisī jagah pahuñch gaī jo Allāh ne us ke lie taiyār kar rakhī thī, tāki wahān 1,260 din tak us kī parwarish kī jāe.

<sup>7</sup> Phir āsmān par jang chhiṛ gaī. Mikāel aur us ke farishte azhdahe se laṛe. Azhdahā aur us ke farishte un se laṛte rahe,

<sup>8</sup> lekin wuh ḡhālib na ā sake balki āsmān par apne maḳām se mahrūm ho gae.

<sup>9</sup> Baṛe azhdahe ko nikāl diyā gayā, us qadīm azhdahe ko jo Iblīs yā Shaitān kahlātā hai aur jo pūrī duniyā ko gumrāh kar detā hai. Use us ke farishtoñ samet zamīn par phaiñkā gayā.

<sup>10</sup> Phir āsmān par ek ūñchī āwāz sunāī dī, “Ab hamāre Ḳhudā kī najāt, qudrat aur bādshāhī ā gaī hai, ab us ke Masīh kā iḳhtiyār ā gayā hai.

Kyōnki hamāre bhāiyōñ aur bahnoñ par ilzām lagāne wālā jo din rāt Allāh ke huzūr un par ilzām lagātā rahtā thā use zamīn par phaiñkā gayā hai.

<sup>11</sup> Īmāndār Lele ke k̄hūn aur apnī gawāhī sunāne ke zariye hī us par ghālib āe haiñ. Unhoñ ne apnī jān azīz na rakhī balki use dene tak taiyār the.

<sup>12</sup> Chunāñche k̄hushī manāo, ai āsmāno! K̄hushī manāo, un meñ basne wālo! Lekin zamīn aur samundar par afsos! Kyōnki Iblīs tum par utar āyā hai. Wuh baṛe ghusse meñ hai, kyōnki wuh jāntā hai ki ab us ke pās waqt kam hai.”

<sup>13</sup> Jab azhdahe ne dekhā ki use zamīn par girā diyā gayā hai to wuh us k̄hātūn ke pīchhe paṛ gayā jis ne bachche ko janm diyā thā.

<sup>14</sup> Lekin k̄hātūn ko baṛe uqāb ke-se do par die gae tāki wuh uṛ kar registān meñ us jagah pahuñche jo us ke lie taiyār kī gāi thī aur jahān wuh sārhe tīn sāl tak azhdahe kī pahuñch se mahfūz rah kar parwarish pāegī.

<sup>15</sup> Is par azhdahe ne apne muñh se pānī nikāl kar dariyā kī sūrat meñ k̄hātūn ke pīchhe pīchhe bahā diyā tāki use bahā le jāe.

<sup>16</sup> Lekin zamīn ne k̄hātūn kī madad karke apnā muñh khol diyā aur us dariyā ko nigal liyā jo azhdahe ne apne muñh se nikāl diyā thā.

<sup>17</sup> Phir azhdahe ko k̄hātūn par ghussā āyā, aur wuh us kī baqī aulād se jang karne ke lie chalā gayā. (K̄hātūn kī aulād wuh haiñ jo Allāh ke ahkām pūre karke Īsā kī gawāhī ko qāym rakhte haiñ.)

18 Aur azhdahā samundar ke sāhil par kharā ho gayā.

## 13

### *Do Haiwān*

<sup>1</sup> Phir main ne dekhā ki samundar meñ se ek haiwān nikal rahā hai. Us ke das sīng aur sāt sar the. Har sīng par ek tāj aur har sar par kufr kā ek nām thā.

<sup>2</sup> Yih haiwān chīte kī mānind thā. Lekin us ke rīchh ke-se pānw aur sherbabar kā-sā muñh thā. Azhdahe ne is haiwān ko apnī quwwat, apnā taḡht aur baṛā iḡhtiyār de diyā.

<sup>3</sup> Lagtā thā ki haiwān ke saron meñ se ek par lā'ilāj zaḡhm lagā hai. Lekin is zaḡhm ko shafā dī gāī. Pūrī duniyā yih dekh kar hairatzadā huī aur haiwān ke pīchhe lag gāī.

<sup>4</sup> Logoñ ne azhdahe ko sijdā kiyā, kyonki usī ne haiwān ko iḡhtiyār diyā thā. Aur unhoñ ne yih kah kar haiwān ko bhī sijdā kiyā, “Kaun is haiwān kī mānind hai? Kaun is se laḡ saktā hai?”

<sup>5</sup> Is haiwān ko baṛī baṛī bāteñ aur kufr bakne kā iḡhtiyār diyā gayā. Aur use yih karne kā iḡhtiyār 42 mahīne ke lie mil gayā.

<sup>6</sup> Yoñ wuh apnā muñh khol kar Allāh, us ke nām, us kī sukūnatgāh aur āsmān ke bāshindoñ par kufr bakne lagā.

<sup>7</sup> Use muḡaddasīn se jang karke un par fatah pāne kā iḡhtiyār bhī diyā gayā. Aur use har qabīle, har ummat, har zabān aur har qaum par iḡhtiyār diyā gayā.

<sup>8</sup> Zamīn ke tamām bāshinde is haiwān ko sijdā kareñge yānī wuh sab jin ke nām duniyā kī

ibtidā se Lele kī kitāb-e-hayāt meñ darj nahīn haiñ, us Lele kī kitāb meñ jo zabah kiyā gayā hai.

<sup>9</sup> Jo sun saktā hai wuh sun le!

<sup>10</sup> Agar kisī ko qaidī bananā hai to wuh qaidī hī banegā. Agar kisī ko talwār kī zad meñ ā kar marnā hai to wuh aise hī maregā. Ab muqaddasīn ko sābitqadmī aur wafādār īmān kī khās zarūrat hai.

<sup>11</sup> Phir main ne ek aur haiwān ko dekhā. Wuh zamīn meñ se nikal rahā thā. Us ke lele ke-se do sīng the, lekin us ke bolne kā andāz azhdahe kā-sā thā.

<sup>12</sup> Us ne pahle haiwān kā pūrā iḡhtiyār us kī khātir istemāl karke zamīn aur us ke bāshindoñ ko pahle haiwān ko sijdā karne par uksāyā, yāñī us haiwān ko jis kā lā'ilāj zaḡhm bhar gayā thā.

<sup>13</sup> Aur us ne baḡe mojiḡānā nishān dikhāe, yahāñ tak ki us ne logoñ ke deḡhte deḡhte āsmān se zamīn par āḡ nāzil hone dī.

<sup>14</sup> Yoñ use pahle haiwān kī khātir mojiḡānā nishān dikhāne kā iḡhtiyār diyā gayā, aur in ke zariye us ne zamīn ke bāshindoñ ko sahīh rāh se bahkāyā. Us ne unheñ kahā ki wuh us haiwān kī tāzīm meñ ek mujassamā banā deñ jo talwār se zaḡhmī hone ke bāwujūd dubārā zindā huā thā.

<sup>15</sup> Phir use pahle haiwān ke mujassame meñ jān ḡalne kā iḡhtiyār diyā gayā tāki mujassamā bol sake aur unheñ qatl karwā sake jo use sijdā karne se inkār karte the.

<sup>16</sup> Us ne yih bhī karwāyā ki har ek ke dahne hāth yā māthe par ek khās nishān lagāyā jāe, khāh wuh chhoḡā ho yā baḡā, amīr ho yā ḡharīb, āzād ho yā ḡhulām.

<sup>17</sup> Sirf wuh shaḡhs kuchh ḡharīd yā bech saktā thā jis par yih nishān lagā thā. Yih nishān haiwān kā nām yā us ke nām kā nambar thā.

<sup>18</sup> Yahān hikmat kī zarūrat hai. Jo samajhdār hai wuh haiwān ke nambar kā hisāb kare, kyoṅki yih ek mard kā nambar hai. Us kā nambar 666 hai.

## 14

### *Lelā aur Us kī Qaum*

<sup>1</sup> Phir main ne dekhā ki Lelā mere sāmne hī Siyyūn ke pahār par kharā hai. Us ke sāth 1,44,000 afrād kharē the jin ke māthoṅ par us kā aur us ke Bāp kā nām likhā thā.

<sup>2</sup> Aur main ne āsmān se ek aisī āwāz sunī jo kisī baṛe ābshār aur garajte bādaloṅ kī ūnchī kaṛak kī mānind thī. Yih us āwāz kī mānind thī jo sarod bajāne wāle apne sāzoṅ se nikālte haiṅ.

<sup>3</sup> Yih 1,44,000 afrād taḡht, chār jāndāroṅ aur buzurgoṅ ke sāmne kharē ek nayā gīt gā rahe the, ek aisā gīt jo sirf wuhī sīkh sake jinheṅ Lele ne zamīn se ḡharīd liyā thā.

<sup>4</sup> Yih wuh mard haiṅ jinhoṅ ne apne āp ko ḡhawātīn ke sāth ālūdā nahīn kiyā, kyoṅki wuh kuṅwāre haiṅ. Jahān bhī Lelā jātā hai wahān wuh bhī jāte haiṅ. Unheṅ bāqī insānoṅ meṅ se fasal ke pahle phal kī haisiyat se Allāh aur Lele ke lie ḡharīdā gayā hai.

<sup>5</sup> Un ke muṅh se kabhī jhūṭ nahīn niklā balki wuh be'ilzām haiṅ.

### *Tīn Farishte*

<sup>6</sup> Phir main ne ek aur farishta dekhā. Wuh mere sar ke ūpar hī hawā meṅ uṛ rahā thā. Us

ke pās Allāh kī abadī ḵhushḵhabrī thī tāki wuh use zamīn ke bāshindoñ yānī har qaum, qabīle, ahl-e-zabān aur ummat ko sunāe.

<sup>7</sup> Us ne ūnchī āwāz se kahā, “Ḵhudā kā ḵhauf mān kar use jalāl do, kyoñki us kī adālat kā waqt ā gayā hai. Use sijdā karo jis ne āsmānoñ, zamīn, samundar aur pānī ke chashmoñ ko ḵhalaq kiyā hai.”

<sup>8</sup> Ek dūsre farishte ne pahle ke pīchhe pīchhe chalte hue kahā, “Wuh gir gayā hai! Hāñ, azīm Bābal gir gayā hai, jis ne tamām qaumoñ ko apnī harāmḵārī aur mastī kī mai pilāī hai.”

<sup>9</sup> In do farishtoñ ke pīchhe ek tīsrā farishtā chal rahā thā. Us ne ūnchī āwāz se kahā, “Jo bhī haiwān aur us ke mujassame ko sijdā kare aur jise bhī us kā nishān apne māthe yā hāth par mil jāe

<sup>10</sup> wuh Allāh ke ḡhazab kī mai se piēgā, aisī mai jo milāwaḡ ke baḡhair hī Allāh ke ḡhazab ke pyāle meñ ḡālī gaī hai. Muḡaddas farishtoñ aur Lele ke huzūr use āḡ aur gandhak kā azāb sahnā paḡegā.

<sup>11</sup> Aur in logoñ ko satāne wālī yih āḡ jaltī raheḡī, is kā dhuāñ abad tak chaḡhtā raheḡā. Jo haiwān aur us ke mujassame ko sijdā karte haiñ yā jinhoñ ne us ke nām kā nishān liyā hai wuh na dīn, na rāt ko ārām pāeñḡe.”

<sup>12</sup> Yahāñ muḡaddasīn ko sābitḡadam rahne kī zarūrāt hai, unheñ jo Allāh ke ahḵām pūre karte aur Isā ke wafādār rahte haiñ.

<sup>13</sup> Phir maiñ ne āsmān se ek āwāz yih kahtī huī sunī, “Likh, mubārak haiñ wuh murde jo ab se Ḵhudāwand meñ wafāt pāte haiñ.”

“Jī hān,” Rūh farmātā hai, “Wuh apnī mehnat-mashaqqat se ārām pāeᅅge, kyoᅅki un ke nek kām un ke pīchhe ho kar un ke sāth chaleᅅge.”

### *Zamīn par Fasal kī Kaᅇāī*

<sup>14</sup> Phir maiᅅn ne ek safed bādāl dekhā, aur us par koī baiᅇhā thā jo Ibn-e-Ādam kī mānind thā. Us ke sar par sone kā tāj aur hāth meᅅ tez darāntī thī.

<sup>15</sup> Ek aur farishtā Allāh ke ghar se nikal kar ūnchī āwāz se pukār kar us se muᅇhātib huā jo bādāl par baiᅇhā thā, “Apnī darāntī le kar fasal kī kaᅇāī kar! Kyoᅅki fasal kāᅇne kā waqt ā gayā hai aur zamīn par kī fasal pak gai hai.”

<sup>16</sup> Chunāᅅche bādāl par baiᅇhne wāle ne apnī darāntī zamīn par chalāī aur zamīn kī fasal kī kaᅇāī huī.

<sup>17</sup> Is ke bād ek aur farishtā Allāh ke us ghar se nikal āyā jo āsmān par hai, aur us ke pās bhī tez darāntī thī.

<sup>18</sup> Phir ek tīsrā farishtā āyā. Use āᅅ par iᅇhtiyār thā. Wuh qurbāᅅgāh se āyā aur ūnchī āwāz se pukār kar tez darāntī pakare hue farishte se muᅇhātib huā, “Apnī tez darāntī le kar zamīn kī angūr kī bel se angūr ke guchche jamā kar, kyoᅅki us ke angūr pak gae haiᅅn.”

<sup>19</sup> Farishte ne zamīn par apnī darāntī chalāī, us ke angūr jamā kie aur unheᅅn Allāh ke ᅅhazab ke us bare hauz meᅅ phaiᅅk diyā jis meᅅ angūr kā ras nikālā jāᅇā hai.

<sup>20</sup> Yih hauz shahr se bāhar wāᅅe thā. Us meᅅ pare angūroᅅ ko itnā raundā gayā ki hauz meᅅ se ᅇhūn bah niklā. ᅇhūn kā yih sailāb 300 kilomīᅇar dūr tak pahunch gayā aur wuh itnā



zyādā thā ki ghoṛoṅ kī lagāmoṅ tak pahuñch gayā.

## 15

### *Ākhirī Balāoṅ ke Farishte*

<sup>1</sup> Phir main ne āsmān par ek aur ilāhī nishān dekhā, jo azīm aur hairatangez thā. Sāt farishte sāt ākhirī balāeṅ apne pās rakh kar khare the. In se Allāh kā ghazab takmīl tak pahuñch gayā.

<sup>2</sup> Main ne shīshe kā-sā ek samundar bhī dekhā jis meṅ āg milāi gai thī. Is samundar ke pās wuh khare the jo haiwān, us ke mujassame aur us ke nām ke nambar par ghālib ā gae the. Wuh Allāh ke die hue sarod pakare

<sup>3</sup> Allāh ke khādīm Mūsā aur Lele kā gīt gā rahe the,

“Ai Rab Qādir-e-mutlaq Khudā,  
tere kām kitne azīm aur hairatangez haiṅ.

Ai zamānoṅ ke Bādshāh,  
terī rāheṅ kitnī rāst aur sachchī haiṅ.

<sup>4</sup> Ai Rab, kaun terā khauf nahīn mānegā?  
Kaun tere nām ko jalāl nahīn degā?

Kyoṅki tū hī quddūs hai.

Tamām qaumeṅ ā kar tere huzūr sijdā kareṅgī,

kyoṅki tere rāst kām zāhir ho gae haiṅ.”

<sup>5</sup> Is ke bād main ne dekhā ki Allāh ke ghar yānī āsmān par ke shariāt ke khaime ko \* khol diyā gayā.

<sup>6</sup> Allāh ke ghar se wuh sāt farishte nikal āe jin ke pās sāt balāeṅ thīn. Un ke katān ke kapre

---

\* 15:5 Yānī mulāqāt ke khaime ko.

sāf-suthrī aur chamak rahe the. Yih kapṛe sīnoñ par sone ke kamarband se bandhe hue the.

<sup>7</sup> Phir chār jāndāroñ meñ se ek ne in sāt farishtoñ ko sone ke sāt pyāle die. Yih pyāle us Ḳhudā ke ḡhazab se bhare hue the jo azal se abad tak zindā hai.

<sup>8</sup> Us waqt Allāh kā ghar us ke jalāl aur qudrat se paidā hone wāle dhueñ se bhar gayā. Aur jab tak sāt farishtoñ kī sāt balāeñ takmīl tak na pahuñchīñ us waqt tak koī bhī Allāh ke ghar meñ dākhl na ho sakā.

## 16

### *Allāh ke Ḡhazab ke Pyāle*

<sup>1</sup> Phir main ne ek ūñchī āwāz sunī jis ne Allāh ke ghar meñ se sāt farishtoñ se kahā, “Jāo, Allāh ke ḡhazab se bhare sāt pyāloñ ko zamīn par unḍel do.”

<sup>2</sup> Pahle farishte ne jā kar apnā pyālā zamīn par unḍel diyā. Is par un logoñ ke jismoñ par bhadde aur taklifdeh phoṛe nikal āe jin par haiwān kā nishān thā aur jo us ke mujassame ko sijdā karte the.

<sup>3</sup> Dūsre farishte ne apnā pyālā samundar par unḍel diyā. Is par samundar kā pāñī lāsh ke-se khūn meñ badal gayā, aur us meñ har zindā maḡhlūq mar gai.

<sup>4</sup> Tīsre farishte ne apnā pyālā dariyāoñ aur pāñī ke chashmoñ par unḍel diyā to un kā pāñī khūn ban gayā.

<sup>5</sup> Phir main ne pāñiyōñ par muḡarrar farishte ko yih kahte sunā, “Tū yih faislā karne meñ rāst hai, tū jo hai aur jo thā, tū jo Quddūs hai.

6 Chūnki unhoñ ne tere muqaddasīn aur nabiyon kī khūnrezī kī hai, is lie tū ne unheñ wuh kuchh de diyā jis ke lāyq wuh haiñ. Tū ne unheñ khūn pilā diyā.”

7 Phir main ne qurbāngāh ko yih jawāb dete sunā, “Hāñ, ai Rab Qādir-e-mutlaq Khudā, haqīqatan tere faisle sachche aur rāst haiñ.”

8 Chauthe farishte ne apnā pyālā sūraj par unḍel diyā. Is par sūraj ko logoñ ko āg se jhulsāne kā iḳhtiyār diyā gayā.

9 Log shadīd tapish se jhulas gae. Aur unhoñ ne Allāh ke nām par kufr bakā jise in balāon par iḳhtiyār thā. Unhoñ ne taubā karne aur use jalāl dene se inkār kiyā.

10 Pāñchweñ farishte ne apnā pyālā haiwān ke taḳht par unḍel diyā. Is par us kī bādshāhī meñ andherā chhā gayā. Log aziyat ke māre apnī zabāneñ kātte rahe.

11 Unhoñ ne apnī taklīfon aur phoḍon kī wajah se āsmān par kufr bakā aur apne kāmon se inkār na kiyā.

12 Chhaṭe farishte ne apnā pyālā baḍe dariyā Furāt par unḍel diyā. Is par us kā pānī sūkh gayā tāki mashriq ke bādshāhon ke lie rāstā taiyār ho jāe.

13 Phir main ne tīn badrūheñ dekhīn jo meñḍakoñ kī mānind thīñ. Wuh azhdahe ke muñh, haiwān ke muñh aur jhūṭe nabī ke muñh meñ se nikal āīñ.

14 Yih meñḍak shayātīn kī rūh haiñ jo mo-jize dikhātī haiñ aur nikal kar pūrī duniyā ke bādshāhon ke pās jātī haiñ tāki unheñ Allāh

Qādir-e-mutlaq ke azīm din par jang ke lie ikaṭṭhā karen.

<sup>15</sup> “Dekho, main chor kī tarah āūngā. Mubāarak hai wuh jo jāgtā rahtā aur apne kapṛe pahne hue rahtā hai tāki use nangī hālat meñ chalnā na paṛe aur log us kī sharmgāh na dekheñ.”

<sup>16</sup> Phir unhoñ ne bādshāhoñ ko us jagah par ikaṭṭhā kiyā jis kā nām Ibrānī zabān meñ harmajiddon hai.

<sup>17</sup> Sātweñ farishte ne apnā pyālā hawā meñ unḍel diyā. Is par Allāh ke ghar meñ taḳht kī taraf se ek ūnchī āwāz sunāī dī jis ne kahā, “Ab kām takmīl tak pahuñch gayā hai!”

<sup>18</sup> Bijliyāñ chamakne lagīñ, shor mach gayā, bādāl garajne lage aur ek shadīd zalzalā āyā. Is qism kā zalzalā zamīn par insān kī taḳhlīq se le kar āj tak nahīñ āyā, itnā saḳht zalzalā kī

<sup>19</sup> azīm shahr tīn hissoñ meñ baṭ gayā aur qaumoñ ke shahr tabāh ho gae. Allāh ne azīm Bābal ko yād karke use apne saḳht ḡhazab kī mai se bharā pyālā pilā diyā.

<sup>20</sup> Tamām jazīre ḡhāyb ho gae aur pahāṛ kahīñ nazar na āe.

<sup>21</sup> Logoñ par āsmān se man man bhar ke baṛe baṛe ole gir gae. Aur logoñ ne oloñ kī balā kī wajah se Allāh par kufr bakā, kyonki yih balā nihāyat saḳht thī.

## 17

### *Mashhūr Kasbī*

<sup>1</sup> Phir sāt pyāle apne pās rakhne wāle in sāt farishtoñ meñ se ek mere pās āyā. Us ne kahā,

“Ā, maiñ tujhe us baṛī kasbī kī sazā dikhā dūñ jo gahre pāñī ke pās baiṭhī hai.

<sup>2</sup> Zamīn ke bādshāhoñ ne us ke sāth zinā kiyā. Hāñ, us kī zinākārī kī mai se zamīn ke bāshinde mast ho gae.”

<sup>3</sup> Phir farishtā mujhe Rūh meñ ek registān meñ le gayā. Wahāñ maiñ ne ek aurat ko dekhā. Wuh ek qirmizī rang ke haiwān par sawār thī jis ke pūre jism par kufr ke nām likhe the aur jis ke sāt sar aur das sīng the.

<sup>4</sup> Yih aurat arghawāñī aur qirmizī rang ke kapṛe pahne aur sone, beshqīmat jawāhar aur motiyōñ se saṛī huī thī. Us ke hāth meñ sone kā ek pyālā thā jo ghinaunī chīzoñ aur us kī zinākārī kī gandagī se bharā huā thā.

<sup>5</sup> Us ke māthe par yih nām likhā thā, jo ek bhed hai, “Azīm Bābal, kasbiyōñ aur zamīn kī ghinaunī chīzoñ kī māñ.”

<sup>6</sup> Aur maiñ ne dekhā ki yih aurat un muqaddasīn ke khūn se mast ho gaī thī jinhoñ ne Isā kī gawāhī dī thī.

Use dekh kar maiñ nihāyat hairān huā.

<sup>7</sup> Farishte ne mujh se pūchhā, “Tū kyoñ hairān hai? Maiñ tujh par aurat aur us haiwān kā bhed khol dūngā jis par aurat sawār hai aur jis ke sāt sar aur das sīng haiñ.

<sup>8</sup> Jis haiwān ko tū ne dekhā wuh pahle thā, is waqt nahīñ hai aur dubārā athāh gaṛhe meñ se nikal kar halākat kī taraf baṛhegā. Zamīn ke jin bāshindoñ ke nām duniyā kī taḥlīq se hī kitāb-e-hayāt meñ darj nahīñ haiñ wuh haiwān ko dekh kar hairatzadā ho jāeñge. Kyoñki wuh pahle thā, is waqt nahīñ hai lekin dubārā āegā.

9 Yahān samajhdār zahan kī zarūrat hai. Sāt saron se murād sāt pahār haiñ jin par yih aurat baiṭhī hai. Yih sāt bādshāhoñ kī numāindagī bhī karte haiñ.

10 In meñ se pānch gir gae haiñ, chhaṭā maujūd hai aur sātwañ abhī āne wālā hai. Lekin jab wuh āegā to use thoṛī der ke lie rahnā hai.

11 Jo haiwān pahle thā aur is waqt nahīn hai wuh aṭhwāñ bādshāh hai, go wuh sāt bādshāhoñ meñ se bhī ek hai. Wuh halākat kī taraf baṛh rahā hai.

12 Jo das sīng tū ne dekhe wuh das bādshāh haiñ jinheñ abhī koī bādshāhī nahīn milī. Lekin unheñ ghaṇṭe-bhar ke lie haiwān ke sāth bādshāh kā iḳhtiyār milegā.

13 Yih ek hī soch rakh kar apnī tāqat aur iḳhtiyār haiwān ko de deñge aur Lele se jang kareñge,

14 lekin Lelā apne bulāe gae, chune hue aur wafādār pairokāroñ ke sāth un par ghālib āegā, kyonki wuh rabboñ kā Rab aur bādshāhoñ kā Bādshāh hai.”

15 Phir farishte ne mujh se kahā, “Jis pānī ke pās tū ne kasbī ko baiṭhī dekhā wuh ummateñ, hujūm, qaumeñ aur zabāneñ hai.

16 Jo haiwān aur das sīng tū ne dekhe wuh kasbī se nafrat kareñge. Wuh use wīrān karke nangā chhoṛ deñge aur us kā gosht khā kar use bhasm kareñge.

17 Kyonki Allāh ne un ke diloñ meñ yih ḍāl diyā hai ki wuh us kā maqsad pūrā kareñ aur us waqt tak hukūmat karne kā apnā iḳhtiyār haiwān ke

sapurd kar deñ jab tak Allāh ke farmān takmīl tak na pahuñch jāēñ.

<sup>18</sup> Jis aurat ko tū ne dekhā wuh wuhī baṛā shahr hai jo zamīn ke bādshāhoñ par hukūmat kartā hai.”

## 18

### *Bābal Shahr kī Shikast*

<sup>1</sup> Is ke bād maiñ ne ek aur farishtā dekhā jo āsmān par se utar rahā thā. Use bahut iḡhtiyār hāsīl thā aur zamīn us ke jalāl se raushan ho gaī.

<sup>2</sup> Us ne ūñchī āwāz se pukār kar kahā, “Wuh gir gaī hai! Hāñ, azīm kasbī Bābal gir gaī hai! Ab wuh shayātīn kā ghar aur har badrūh kā baserā ban gaī hai, har nāpāk aur ghinaune parinde kā baserā.

<sup>3</sup> Kyoñki tamām qaumoñ ne us kī harāmkārī aur mastī kī mai pī lī hai. Zamīn ke bādshāhoñ ne us ke sāth zinā kiyā aur zamīn ke saudāgar us kī belagām aiyāshī se amīr ho gae haiñ.”

<sup>4</sup> Phir maiñ ne ek aur āwāz sunī. Us ne āsmān kī taraf se kahā,

“Ai merī qaum, us meñ se nikal ā,  
tāki tum us ke gunāhoñ meñ sharīk na ho jāo  
aur us kī balāēñ tum par na āēñ.

<sup>5</sup> Kyoñki us ke gunāh āsmān tak pahuñch gae haiñ,

aur Allāh un kī badiyoñ ko yād kartā hai.

<sup>6</sup> Us ke sāth wuhī sulūk karo  
jo us ne tumhāre sāth kiyā hai.

Jo kuchh us ne kiyā hai  
us kā dugnā badlā use denā.

Jo sharāb us ne dūsroñ ko pilāne ke lie taiyār  
kī hai

us kā dugnā badlā use de denā.

<sup>7</sup> Use utnī hī aziyat aur ḡham pahuñchā do  
jitnā us ne apne āp ko shāndār banāyā aur  
aiyāshī kī.

Kyōñki apne dil meñ wuh kahtī hai,

‘Maiñ yahāñ apne taḡht par rāñī hūñ.

Na maiñ bewā hūñ, na maiñ kabhī mātam  
karūñgī.’

<sup>8</sup> Is wajah se ek din yih balāeñ yāñī maut,  
mātam aur kāl

us par āñ paṛeñgī.

Wuh bhasm ho jāegī,

kyōñki us kī adālat karne wālā Rab Ḳhudā  
qawī hai.”

<sup>9</sup> Aur zamīn ke jin bādshāhoñ ne us ke sāth  
zinā aur aiyāshī kī wuh us ke jalne kā dhuāñ  
dekh kar ro paṛeñge aur āh-o-zārī kareñge.

<sup>10</sup> Wuh us kī aziyat ko dekh kar ḡhauf khāeñge  
aur dūr dūr khaṛe ho kar kaheñge, “Afsos! Tujh  
par afsos, ai azīm aur tāqatwar shahr Bābal! Ek  
hī ghañṭe ke andar andar Allāh kī adālat tujh par  
ā gāi hai.”

<sup>11</sup> Zamīn ke saudāgar bhī use dekh kar ro  
paṛeñge aur āh-o-zārī kareñge, kyōñki koī  
nahīñ rahā hogā jo un kā māl ḡharīde:

<sup>12</sup> un kā sonā, chāñdī, beshqīmat jawāhar,  
motī, bārīk katān, arḡhawāñī aur qirmizī rang  
kā kapṛā, resham, har qism kī ḡhushbūdār  
lakaṛī, hāthīdāñt kī har chīz aur qīmtī lakaṛī,  
pītal, lohe aur sang-e-marmar kī har chīz,



13 dārchīnī, masālā, agarbattī, mur, baḥhūr, mai, zaitūn kā tel, behtarīn maidā, gandum, gāy-bail, bheṛeñ, ghoṛe, rath aur ḡhulām yānī insān.

14 Saudāgar us se kaheñge, “Jo phal tū chāhtī thī wuh tujh se dūr ho gayā hai. Terī tamām daulat aur shān-o-shaukat ḡhāyb ho gaī hai aur āindā kabhī bhī tere pās pāī nahīn jāegī.”

15 Jo saudāgar use yih chīzeñ faroḳht karne se daulatmand hue wuh us kī aziyat dekh kar ḳhauf ke māre dūr dūr ḳhaṛe ho jāeñge. Wuh ro ro kar mātam kareñge

16 aur kaheñge, “Hāy! Tujh par afsos, ai azīm shahr, ai ḳhātūn jo pahle bārīk katān, arḡhawānī aur qirmizī rang ke kapṛe pahne phirtī thī aur jo sone, qīmī jawāhar aur motiyon se sajī huī thī.

17 Ek hī ghañṭe ke andar andar sārī daulat tabāh ho gaī hai!”

Har bahrī jahāz kā kaptān, har samundarī musāfir, har mallāh aur wuh tamām log jo samundar par safr karne se apnī rozī kamāte haiñ wuh sab dūr dūr ḳhaṛe ho jāeñge.

18 Us ke jalne kā dhuān dekh kar wuh kaheñge, “Kyā kabhī koī itnā azīm shahr thā?”

19 Wuh apne saron par ḳhāk ḍāl leñge aur chillā chillā kar roeñge aur āh-o-zārī kareñge. Wuh kaheñge, “Hāy! Tujh par afsos, ai azīm shahr, jis kī daulat se tamām bahrī jahāzon ke mālik amīr hue. Ek hī ghañṭe ke andar andar wuh wīrān ho gayā hai.”

20 Ai āsmān, use dekh kar ḳhushī manā!

Ai muḳaddaso, rasūlo aur nabīyo, ḳhushī manāo!

Kyonki Allāh ne tumhārī ḡhātir us kī adālat kī hai.

<sup>21</sup> Phir ek tāqatwar farishte ne baṛī chakkī ke pāṭ kī mānind ek baṛe patthar ko uṭhā kar samundar meñ phaiñk diyā. Us ne kahā, “Azīm shahr Bābal ko itnī hī zabardastī se paṭak diyā jāegā. Bād meñ use kahīn nahīn pāyā jāegā.

<sup>22</sup> Ab se na mausīqāron kī āwāzeñ tujh meñ kabhī sunāi deñgī, na sarod, bāñsrī yā turam bajāne wālon kī. Ab se kisī bhī kām kā kāriḡar tujh meñ pāyā nahīn jāegā. Hāñ, chakkī kī āwāz hameshā ke lie band ho jāegī.

<sup>23</sup> Ab se charāḡh tujhe raushan nahīn karegā, dulhan-dūlhe kī āwāz tujh meñ sunāi nahīn degī. Hāy, tere saudāgar duniyā ke baṛe baṛe afsar the, aur terī jādūgarī se tamām qaumoñ ko bahkāyā gayā.”

<sup>24</sup> Hāñ, Bābal meñ nabiyon, muḡaddasīn aur un tamām logon kā ḡhūn pāyā gayā hai jo zamīn par shahīd ho gae haiñ.

## 19

<sup>1</sup> Is ke bād maiñ ne āsmān par ek baṛe hujūm kī-sī āwāz sunī jis ne kahā, “Allāh kī tamjīd ho! Najāt, jalāl aur qudrat hamāre ḡhudā ko hāsīl hai.

<sup>2</sup> Kyonki us kī adālateñ sachchī aur rāst haiñ. Us ne us baṛī kasbī ko mujrim ṭhahrāyā hai jis ne zamīn ko apnī zinākārī se bigāṛ diyā. Us ne us se apne ḡhādimoñ kī qatl-o-ḡhārat kā badlā le liyā hai.”

<sup>3</sup> Aur wuh dubārā bol uṭhe, “Allāh kī tamjīd ho! Is shahr kā dhuān abad tak chaṛhtā rahtā hai.”

<sup>4</sup> Chaubīs buzurgoñ aur chār jāndāroñ ne gir kar taḡht par baiṭhe Allāh ko sijdā kiyā. Unhoñ ne kahā, “Āmīn, Allāh kī tamjīd ho.”

### *Lele kī Ziyāfat*

<sup>5</sup> Phir taḡht kī taraf se ek āwāz sunāī dī. Us ne kahā, “Ai us ke tamām ḡhādimo, hamāre ḡhudā kī tamjīd karo. Ai us kā ḡhauf mānane wālo, ḡhāh bare ho yā chhoṭe us kī satāish karo.”

<sup>6</sup> Phir main ne ek bare hujūm kī-sī āwāz sunī, jo barī ābshār ke shor aur garajte bādaloñ kī kaṛak kī mānind thī. In logoñ ne kahā, “Allāh kī tamjīd ho! Kyoñki hamārā Rab Qādir-e-mutlaq ḡhudā taḡhtnashīn ho gayā hai.

<sup>7</sup> Āo, ham masrūr hoñ, ḡhushī manāeñ aur use jalāl deñ, kyoñki Lele kī shādī kā waqt ā gayā hai. Us kī dulhan ne apne āp ko taiyār kar liyā hai,

<sup>8</sup> aur use pahnane ke lie bārīk katān kā chamaktā aur pāk-sāf libās de diyā gayā.” (Bārīk katān se murād muḡaddasīn ke rāst kām haiñ.)

<sup>9</sup> Phir farishte ne mujh se kahā, “Likh, mubārak haiñ wuh jinheñ Lele kī shādī kī ziyāfat ke lie dāwat mil gāī hai.” Us ne mazīd kahā, “Yih Allāh ke sachche alfāz haiñ.”

<sup>10</sup> Is par main use sijdā karne ke lie us ke pānwoñ meñ gir gayā. Lekin us ne mujh se kahā, “Aisā mat kar! Main bhī terā aur tere un bhāiyōñ kā hamḡhidmat hūñ jo Īsā kī gawāhī dene par qāym haiñ. Sirf Allāh ko sijdā kar. Kyoñki jo Īsā

ke bāre meñ gawāhī detā hai wuh yih nabuwwat kī rūh meñ kartā hai.”

### *Safed Ghoṛe kā Sawār*

<sup>11</sup> Phir main ne āsmān ko khulā dekhā. Ek safed ghoṛā nazar āyā jis ke sawār kā nām “Wafādār aur sachchā” hai, kyonki wuh insāf se adālat aur jang kartā hai.

<sup>12</sup> Us kī ānkheñ bharakte shole kī mānind haiñ aur us ke sar par bahut-se tāj haiñ. Us par ek nām likhā hai jise sirf wuhī jāntā hai, koī aur use nahīñ jāntā.

<sup>13</sup> Wuh ek libās se mulabbas thā jise khūn meñ dūboyā gayā thā. Us kā nām “Allāh kā Kalām” hai.

<sup>14</sup> Āsmān kī faujeñ us ke pīchhe pīchhe chal rahī thīñ. Sab safed ghoṛoñ par sawār the aur bārīk katān ke chamakte aur pāk-sāf kapṛe pahne hue the.

<sup>15</sup> Us ke muñh se ek tez talwār nikaltī hai jis se wuh qaumoñ ko mār degā. Wuh lohe ke shāhī asā se un par hukūmat karegā. Hāñ, wuh angūr kā ras nikālne ke hauz meñ unheñ kuchal dālegā. Yih hauz kyā hai? Allāh Qādir-e-mutlaq kā saḡht ḡhazab.

<sup>16</sup> Us ke libās aur rān par yih nām likhā hai, “Bādshāhoñ kā Bādshāh aur rabboñ kā Rab.”

<sup>17</sup> Phir main ne ek farishtā sūraj par khaṛā dekhā. Us ne ūñchī āwāz se pukār kar un tamām parindoñ se jo mere sar par mandlā rahe the kahā, “Āo, Allāh kī baṛī ziyāfat ke lie jamā ho jāo.

<sup>18</sup> Phir tum bādshāhoñ, jarnailoñ, baṛe baṛe afsaroñ, ghoṛoñ aur un ke sawāroñ kā gosht

khāoge, hān tamām logoñ kā gosht, khāh āzād hoñ yā ghulām, chhoṭe hoñ yā bare.”

<sup>19</sup> Phir main ne haiwān aur bādshāhoñ ko un kī faujon samet dekhā. Wuh ghoṛe par “Allāh kā Kalām” nāmī sawār aur us kī fauj se jang karne ke lie jamā hue the.

<sup>20</sup> Lekin haiwān ko giriftār kiyā gayā. Us ke sāth us jhūṭe nabī ko bhī giriftār kiyā gayā jis ne haiwān kī khātir mojizānā nishān dikhāe the. In mojizon ke wasīle se us ne un ko fareb diyā thā jinheñ haiwān kā nishān mil gayā thā aur jo us ke mujassame ko sijdā karte the. Donoñ ko jaltī huī gandhak kī sholāḳhez jhīl meñ phaiñkā gayā.

<sup>21</sup> Bāqī logoñ ko us talwār se mār ḍālā gayā jo ghoṛe par sawār ke muñh se nikaltī thī. Aur tamām parinde lāshoñ kā gosht khā kar ser ho gae.

## 20

### *Hazār Sāl kā Daur*

<sup>1</sup> Phir main ne ek farishtā dekhā jo āsmān se utar rahā thā. Us ke hāth meñ athāh gaṛhe kī chābī aur ek bhārī zanjīr thī.

<sup>2</sup> Us ne azhdahe yānī qadīm sānp ko jo Shaitān yā Iblīs kahlātā hai pakar kar hazār sāl ke lie bāndh liyā.

<sup>3</sup> Us ne use athāh gaṛhe meñ phaiñk kar tālā lagā diyā aur us par muhr lagā dī tāki wuh hazār sāl tak qaumoñ ko gumrah na kar sake. Us ke bād zarūrī hai ki use thoṛī der ke lie āzād kar diyā jāe.

<sup>4</sup> Phir main ne taḳht dekhe jin par wuh baiṭhe the jinheñ adālat karne kā iḳhtiyār diyā gayā

thā. Aur main ne un kī rūh dekhīn jinheñ Īsā ke bāre meñ gawāhī dene aur jin kā Allāh kā kalām pesh karne kī wajah se sar qalam kiyā gayā thā. Unhoñ ne haiwān yā us ke mujassame ko sijdā nahīn kiyā thā, na us kā nishān apne māthoñ yā hāthoñ par lagwāyā thā. Ab yih log zindā hue aur hazār sāl tak Masīh ke sāth hukūmat karte rahe.

<sup>5</sup> (Bāqī murde hazār sāl ke iḡtītām par hī zindā hue.) Yih pahlī qiyāmat hai.

<sup>6</sup> Mubāarak aur muḡaddas haiñ wuh jo is pahlī qiyāmat meñ sharīk haiñ. In par dūsri maut kā koī iḡhtiyār nahīn hai balki yih Allāh aur Masīh ke imām ho kar hazār sāl tak us ke sāth hukūmat karenge.

### *Iblīs kī Shikast*

<sup>7</sup> Hazār sāl guzar jāne ke bād Iblīs ko us kī qaid se āzād kar diyā jāegā.

<sup>8</sup> Tab wuh nikal kar zamīn ke chāroñ konoñ meñ maujūd qaumoñ banām Jūj aur Mājūj ko bahkāegā aur unheñ jang karne ke lie jamā karegā. Larne wāloñ kī tādād sāhil par kī ret ke zarroñ jaisī beshumār hogī.

<sup>9</sup> Unhoñ ne zamīn par phail kar muḡaddasīn kī lashkargāh ko gher liyā, yānī us shahr ko jise Allāh pyār kartā hai. Lekin āg ne āsmān se nāzil ho kar unheñ harap kar liyā.

<sup>10</sup> Aur Iblīs ko jis ne un ko fareb diyā thā jaltī huī gandhak kī jhīl meñ phaiñkā gayā, wahāñ jahāñ haiwān aur jhūṭe nabī ko pahle phaiñkā gayā thā. Us jagah par unheñ din rāt balki abad tak azāb sahnā paṛegā.

### *Ākhirī Adālat*

<sup>11</sup> Phir main ne ek baṛā safed taḡht dekhā aur use jo us par baiṭhā hai. Āsmān-o-zamīn us ke huzūr se bhāḡ kar ḡhāyb ho gae.

<sup>12</sup> Aur main ne tamām murdoñ ko taḡht ke sāmne khare dekhā, ḡhāh wuh chhoṭe the yā baṛe. Kitābeñ kholī gaīñ. Phir ek aur kitāb ko khol diyā gayā jo kitāb-e-hayāt thī. Murdoñ kā us ke mutābiq faislā kiyā gayā jo kuchh unhoñ ne kiyā thā aur jo kitāboñ meñ darj thā.

<sup>13</sup> Samundar ne un tamām murdoñ ko pesh kar diyā jo us meñ the, aur Maut aur Pātāl ne bhī un murdoñ ko pesh kar diyā jo un meñ the. Chunāñche har shaḡhs kā us ke mutābiq faislā kiyā gayā jo us ne kiyā thā.

<sup>14</sup> Phir maut aur Pātāl ko jaltī huī jhīl meñ phaiñkā gayā. Yih jhīl dūsri maut hai.

<sup>15</sup> Jis kisī kā nām kitāb-e-hayāt meñ darj nahīñ thā use jaltī huī jhīl meñ phaiñkā gayā.

## 21

### *Nayā Āsmān aur Naī Zamīn*

<sup>1</sup> Phir main ne ek nayā āsmān aur ek naī zamīn dekhī. Kyoñki pahlā āsmān aur pahlī zamīn ḡhatm ho gae the aur samundar bhī nest thā.

<sup>2</sup> Main ne nae Yarūshalam ko bhī dekhā. Yih muḡaddas shahr dulhan kī sūrat meñ Allāh ke pās se āsmān par se utar rahā thā. Aur yih dulhan apne dūlhe ke lie taiyār aur saji huī thī.

<sup>3</sup> Main ne ek āwāz sunī jis ne taḡht par se kahā, “Ab Allāh kī sukūnatḡāh insānoñ ke darmiyān

hai. Wuh un ke sāth sukūnat karegā aur wuh us kī qaum hoṅge. Allāh ḵhud un kā Ḵhudā hogā.

<sup>4</sup> Wuh un kī ānkhoṅ se tamām ānsū poṅchh dālegā. Ab se na maut hogī na mātām, na ronā hogā na dard, kyonki jo bhī pahle thā wuh jātā rahā hai.”

<sup>5</sup> Jo taḵht par baiṭhā thā us ne kahā, “Maiṅ sab kuchh nae sire se banā rahā hūṅ.” Us ne yih bhī kahā, “Yih likh de, kyonki yih alfāz qābil-e-etamād aur sachche haiṅ.”

<sup>6</sup> Phir us ne kahā, “Kām mukammal ho gayā hai! Maiṅ Alif aur Ye, Awwal aur Āḵhir hūṅ. Jo pyāsā hai use maiṅ zindagī ke chashme se muft pānī pilāūṅgā.

<sup>7</sup> Jo ḡhālib āegā wuh yih sab kuchh wirāsat meṅ pāegā. Maiṅ us kā Ḵhudā hūṅgā aur wuh merā farzand hogā.

<sup>8</sup> Lekin buzdiloṅ, ḡhairīmāndāroṅ, ḡhin-aunoṅ, qātiloṅ, zinākāroṅ, jādūgaroṅ, but-parastoṅ aur tamām jhūṭe logoṅ kā anjām jaltī hūī gandhak kī sholāḵhez jhīl hai. Yih dūsri maut hai.”

### *Nayā Yarūshalam*

<sup>9</sup> Jin sāt farishtoṅ ke pās sāt āḵhirī balāoṅ se bhare pyāle the un meṅ se ek ne mere pās ā kar kahā, “Ā, maiṅ tujhe dulhan yānī Lele kī bīwī dikhāūṅ.”

<sup>10</sup> Wuh mujhe Rūh meṅ uṭhā kar ek baṛe aur ūṅche pahār par le gayā. Wahāṅ se us ne mujhe muqaddas shahr Yarūshalam dikhāyā jo Allāh kī taraf se āsmān par se utar rahā thā.



11 Use Allāh kā jalāl hāsīl thā aur wuh anmol jauhar balki billaur jaise sāf-shaffāf yashab kī tarah chamak rahā thā.

12 Us kī baṛī aur ūnchī fasīl meñ bārah darwāze the, aur har darwāze par ek farishtā khaṛā thā. Darwāzōñ par Isrāīl ke bārah qabīlōñ ke nām likhe the.

13 Tīn darwāze mashriq kī taraf the, tīn shimāl kī taraf, tīn junūb kī taraf aur tīn maḡhrib kī taraf.

14 Shahr kī fasīl kī bārah buniyādeñ thīñ jin par Lele ke bārah rasūlōñ ke nām likhe the.

15 Jis farishte ne mujh se bāt kī thī us ke pās sone kā gaz thā tāki shahr, us ke darwāzōñ aur us kī fasīl kī paimāish kare.

16 Shahr chaukor thā. Us kī lambāī utnī hī thī jitnī us kī chauṛāī. Farishte ne gaz se shahr kī paimāish kī to patā chalā ki us kī lambāī, chauṛāī aur ūnchāī 2,400 kilomīṭar hai.

17 Jab us ne fasīl kī paimāish kī to chauṛāī 60 mīṭar thī yānī us paimāne ke hisāb se jo wuh istemāl kar rahā thā.

18 Fasīl yashab kī thī jabki shahr ḡhālis sone kā thā, yānī sāf-shaffāf shīshe jaise sone kā.

19 Shahr kī buniyādeñ har qism ke qīmtī jawāhar se saji huī thīñ: pahlī yashab \* se, dūsri sang-e-lājaward † se, tīsri sang-e-yamānī ‡ se, chauthī zumurrad se,

20 pāñchwīñ sang-e-sulemānī § se, chhaṭī aqīq-

---

\* 21:19 jasper    † 21:19 lapis lazuli    ‡ 21:19 chalcedony

§ 21:20 sardonyx. Yānī sang-e-sulemānī kī ek qism jis meñ nāranji aur safed aqīq ke parat yake bād dīgare hote haiñ.

e-ahmar \* se, sātwin zabarjad † se, āṭhwīn āb-e-bahr ‡ se, nawwīn pukhrāj § se, daswīn aqīq-e-sabz \* se, gyārhwīn nīle rang ke zarqon † se aur bārhwīn yāqūt-e-arḡhawānī ‡ se.

21 Bārah darwāze bārah motī the aur har darwāzā ek motī kā thā. Shahr kī baṛī saṛak ḡhālis sone kī thī, yānī sāf-shaffāf shīshe jaise sone kī.

22 Main ne shahr meñ Allāh kā ghar na dekhā, kyōnki Rab Qādir-e-mutlaq Ḡhudā aur Lelā hī us kā maqdis haiñ.

23 Shahr ko sūraj yā chānd kī zarūrat nahīn jo use raushan kare, kyōnki Allāh kā jalāl use raushan kar detā hai aur Lelā us kā charāḡh hai.

24 Qaumeñ us kī raushnī meñ chaleḡgī, aur zamīn ke bādshāh apnī shān-o-shaukat us meñ lāeḡge.

25 Us ke darwāze kisī bhī din band nahīn hoḡge kyōnki wahāñ kabhī bhī rāt kā waqt nahīn aegā.

26 Qaumoñ kī shān-o-shaukat us meñ lāī jāegī.

27 Koī nāpāk chīz us meñ dākḡhil nahīn hogī, na wuh jo ḡhinaunī harkateñ kartā aur jhūṭ boltā hai. Sirf wuh dākḡhil hoḡge jin ke nām Lele kī kitāb-e-hayāt meñ darj haiñ.

## 22

### *Mukāshafā*

---

\* 21:20 carnelian † 21:20 peridot ‡ 21:20 beryl § 21:20 topaz  
 \* 21:20 chrysoprase † 21:20 Yūnānī lafz kuchh mubham-sā hai. ‡ 21:20 amethyst

<sup>1</sup> Phir farishte ne mujhe zindagī ke pānī kā dariyā dikhāyā. Wuh billaur jaisā sāf-shaffāf thā aur Allāh aur Lele ke taḡht se nikal kar

<sup>2</sup> shahr kī baṛī saṛak ke bīch meñ se bah rahā thā. Dariyā ke donoñ kināroñ par zindagī kā daraḡht thā. Yih daraḡht sāl meñ bārah dafā phal lātā thā, har mahīne meñ ek bār. Aur daraḡht ke patte qaumoñ kī shafā ke lie istemāl hote the.

<sup>3</sup> Wahāñ koī bhī malaūn chīz nahīn hogī. Allāh aur Lele kā taḡht shahr meñ hoñge aur us ke ḡhādīm us kī ḡhidmat karenge.

<sup>4</sup> Wuh us kā chehrā dekheñge, aur us kā nām un ke māthoñ par hogā.

<sup>5</sup> Wahāñ rāt nahīn hogī aur unheñ kisī charāḡh yā sūraj kī raushnī kī zarūrat nahīn hogī, kyoñki Rab Ḳhudā unheñ raushnī degā. Wahāñ wuh abad tak hukūmat karenge.

### *Īsā kī Āmad*

<sup>6</sup> Farishte ne mujh se kahā, “Yih bāteñ ḡabil-etamād aur sachchī haiñ. Rab ne jo nabiyōñ kī rūhoñ kā Ḳhudā hai apne farishte ko bhej diyā tāki apne ḡhādimoñ ko wuh kuchh dikhāe jo jald hone wālā hai.”

<sup>7</sup> Īsā farmātā hai, “Dekho, main jald āūngā. Mubāarak hai wuh jo is kitāb kī peshgoiyōñ ke mutābiq zindagī guzārtā hai.”

<sup>8</sup> Main Yūhannā ne ḡhud yih kuchh sunā aur dekhā hai. Aur use sunane aur deḡhne ke bād main us farishte ke pānwoñ meñ gir gayā jis ne mujhe yih dikhāyā thā aur use sijdā karnā chāhtā thā.

9 Lekin us ne mujh se kahā, “Aisā mat kar! Maiñ bhī usī kā k̄hādim hūñ jis kā tū, tere bhāi nabī aur kitāb kī pairawī karne wāle haiñ. K̄hudā hī ko sijdā kar!”

10 Phir us ne majhe batāyā, “Is kitāb kī peshgoiyōñ par muhr mat lagānā, kyoñki waqt qarīb ā gayā hai.

11 Jo ḡhalat kām kar rahā hai wuh ḡhalat kām kartā rahe. Jo ghinaunā hai wuh ghinaunā hotā jāe. Jo rāstbāz hai wuh rāstbāzī kartā rahe. Jo muqaddas hai wuh muqaddas hotā jāe.”

12 Īsā farmātā hai, “Dekho, maiñ jald āne ko hūñ. Maiñ ajr le kar āūngā aur maiñ har ek ko us ke kāmōñ ke muwāfiq ajr dūngā.

13 Maiñ Alif aur Ye, Awwal aur Āk̄hir, Ibtidā aur Intahā hūñ.”

14 Mubāarak haiñ wuh jo apne libās ko dhote haiñ. Kyoñki wuh zindagī ke daraḳht ke phal se khāne aur darwāzoñ ke zariye shahr meñ dāḳhil hone kā haq rakhte haiñ.

15 Lekin bāqī sab shahr ke bāhar raheñge. Kutte, zinākār, qātil, butparast aur tamām wuh log jo jhūṭ ko pyār karte aur us par amal karte haiñ sab ke sab bāhar raheñge.

16 “Maiñ Īsā ne apne farishte ko tumhāre pās bhejā hai tāki wuh jamātoñ ke lie tumheñ in bātoñ kī gawāhī de. Maiñ Dāūd kī Jaṛ aur Aulād hūñ, maiñ hī chamaktā huā Subah kā Sitārā hūñ.”

17 Rūh aur dulhan kahtī haiñ, “Ā!”

Har sunane wālā bhī yihī kahe, “Ā!”

Jo pyāsā ho wuh āe aur jo chāhe wuh zindagī kā pāñī muft le le.

*Ḳhulāsā*

<sup>18</sup> Maiñ, Yūhannā har ek ko jo is kitāb kī peshgoiyāñ suntā hai āgāh kartā hūñ, agar koī is kitāb meñ kisī bhī bāt kā izāfā kare to Allāh us kī zindagī meñ un balāoñ kā izāfā karegā jo is kitāb meñ bayān kī gaī haiñ.

<sup>19</sup> Aur agar koī nabuwwat kī is kitāb se bāteñ nikāle to Allāh us se kitāb meñ mazkūr zindagī ke darakht ke phal se khāne aur muqaddas shahr meñ rahne kā haq chhīn legā.

<sup>20</sup> Jo in bātoñ kī gawāhī detā hai wuh farmātā hai, “Jī hāñ! Maiñ jald hī āne ko hūñ.” “Āmīn! Ai Ḳhudāwand Īsā ā!”

<sup>21</sup> Ḳhudāwand Īsā kā fazl sab ke sāth rahe.

**Kitab-i Muqaddas**  
**The Holy Bible in Urdu, Urdu Geo Version, Roman**  
**Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

---

PDF generated using Haiola and XeLaTeX on 15 May 2025 from source files dated 15 May 2025

123ff8cb-27b3-5817-a02a-22e67145fd30